



刻孫百川先生文集

明海虞百川孫 樓子虛父 著

同邑年家子陳禹謨錫玄父

選次

叔 孫七政齊之父

姪 孫朝肅恭甫父

校閱

梁溪子壻華滋蕃伯昌父

明故北虞邵先生墓誌銘

稽古畸人於時罔際坎壈骯髒竟沒以歿者何限也然
畜于名者或豐於壽薄于積者或厚於位世所稱貧賤拂
鬱沉淪天札諸所不堪處而備嘗於一人者亦鮮有之茲
以槩於北虞邵先生悲哉天乎胡獨阨之若是邪無負郭

以瞻其生無卓錫以庇其後之人終其身一縫掖且不登
下壽世僅有知之者亦止其姻交與其所嘗遊歷之鄉已
耳豈天信阨之邪信阨之又胡予之才也先生少稟殊質
書過目輒了大義驚人傑句溢於筆端時號異童郡大夫
暨督學使者聯選為第一人應試白下猶未弱冠也自是
志彌厲業彌精淬金鏤鑿入髓剗心幾無遺巧朝甫脫稿
暮傳國中矣其視一第可芥取乃偃蹇秋賦者七簡斥春
官者五歲已酉以春秋明經入教尚屈一籌丙辰簾內外
有物色之者而有司擯不得與壬戌幸收之矣而猥以中
場較劣又斥去然先生於時義中論表最長無膚反劣也
先生爾時且踰艾耻復與諸少年競旅資罄然固以為歸

或諷之祿仕先生始揮涕若難之已乃首肯強顏謁選授
德清校官過吳不返其廬遂驅車以去間數一二東報所
知曰秦龍人今養狙矣德清為吳興下邑士可與進者無
幾先生將大新之甫振鐸隣郡雅熟其望者交軌而至執
經座右僦屋舍旁者數百人市中薪米騰貴先生羣于德
士而胥誨之日有課旬有試人為銓品句為竄點又藩臬
諸大夫以上官來乞文使者交午於道先生忘其疲而酬
之而已不勝其後矣居無何卒官先生雅攻古文辭方駕
作者竟一篇無長語類句當會心處若平地削出笑容不
雜土石不假陂陁峭拔適聳蒼翠可把詩婉麗悲壯即在
閒適時作嗟悼語蓋其中無一日之怡也先生篤於天倫

父母無恙時資館穀為養出必戒其婦日具甘滑上食二親無負憂同母弟玉潔教之食之相友者五十年無違言寡姊弱妹悉收養一堂故食指實繁而饋粥罔繼間得賣文金或餉之酒輒召所歡豪飲大嚼無幾日金罄矣雖晨突不烟意豁如也先生昂藏豐偉若鵠立羣雞中人有不善輒義形于色裂眦視之而平生石交晚益莫忤壯日偕同志數輩結文社於叢祠不四三舉盡脫穎去遂空其羣社中一二躋華要者儼剡薦先生而已脩文地下矣悲哉天乎胡獨阨之若是邪邨世家常熟之蘆荻村至某贅城中盛氏遂為城中八邑之有邨巷始此又三傳守齋先生邑稱聞人守齋生甘拙翁賜生先生母朱氏配張氏

所同拮据者也子男二人鑿娶吳氏理鄉虞東公孫太學生三吳君女鑿聘張氏贛守立齋公孫太學生小立君女女三人適太學生徐樓庠生李元坊顧廷臬先生自懲以儒誤身不過督其子而鑿乃知學蚤有父風門人武選郎復軒錢君心憐之經紀其家歲輸之粟賻賙有加禮焉送死事居人欽高義樓也同門媿屈於力先生于正德庚午十月十二日卒於嘉靖癸亥十月十六日年五十有四葬以卒之後四年丙寅十一月十六日墓在興福里先生諱圭潔字伯如北虞其別號也昔守齋之葬迪功郎徐昌穀其門人也為之銘先生之懿寔踰厥祖而樓之末學遠讓迪功胡敢銘先生哉顧知先生者宜莫如樓又胡敢不

百川先生集 卷之十
銘先生我銘曰

彼其之子其飽欲死而先生恒饑彼其之子其出有車而先生無居其長也以文而再黜者文其仕也為貧而不減於貧此而黃馘孰為青雲吾以問天聞乎不聞抔土兮載魄廖廓兮游魂惟志士之噫氣噴日星而為昏先生已矣不死者神

明故南畿經元景言陳君墓志銘

君生而穎異甫髫年日強記可數千言且工帖括督學使者異而試之援筆立就藁無竄點即擊鉢刻燭難以言疾一時譁然名動三吳縉紳間目為奇童爭索一見陳生為快一蒼頭負君以往所至環而視之君膚指而髮漆唇若

金丹對眾吐語罪、玉屑悉老宿所不能道環而觀者又莫不驚嘆是年選為校官弟子僅八齡耳君業以藝進益思以屈其羣掃除一室充斥圖史晝夜覃精鏤心不少休以家人呼食寢若弗聞也君雖業毛詩學而六經四子漢唐以下諸儒訓詁箋釋靡不研習凡經史子集通達國體可備文戰者又擷其菁華而課讀之其學寧支離以自苦無寧鹵莽而幸捷歲積所撰義臣冊而細書者纍、凡上暇則手而自哦以為愉快間出以示余若商彝周鼎雖黠泐剝蝕與用者若不相狎而典質貴重蒼翠可把故知君者希而一與知者遇輒抵掌擊節自詫得一國士紛、諸子無論也當是時君且十從鄉賦矣而始捷于嘉靖甲子

為毛詩學第一人是歲房考例用京朝官由進士而登仕者主君者則吏部郎蔡先生故江右名士也君又五從偕計而迄無一遇歲丁丑君且踰耆矣乃其志猶八齡時也冒疾而北復以疾廢試雖廢試猶伏枕手其故所撰而哦比撒棘問捷者為誰歎曰渠豈賢于我哉我亦終當若是乃心耳歸未渡淮卒於僦舟寔萬曆五年四月五日也年六十有三嗚呼悲哉學未逮君十之一二而獵芳名躋臚仕者何限宜君之高於自視且果於自信瀕死而不止也使君劬書不極亦可不病矣而爭名之念不少決亦可不往矣卒之不勝病以死而又客死也悲哉死之日同鄉友倉卒贖金為殮君名子忠字孝甫景言其所自號以

三吳文獻始言游氏故厥志亦遠矣陳之先有諱璧者景泰甲戌登進士仕為御史璧生世禎世禎生紹榮號靜山娶李氏以正德乙亥二月一日生君娶王氏北山王思親女王翁善擇壻三女咸得所配君其季壻也子二長拱宸曩君未子抱同姓子而子之且教之今為郡庠生娶宋河陽女次拱明側出聘庠生徐虞弦女適庠生沈文度丁懋中王出也適太學生陸撫謙者則孫氏姊出而鞠於君余從妹也君終其身無一日廢書不觀又終其身不仕無一日効于官有可紀之績故余所為志君者僅詳其學云談者謂君潔癖似雲林石癖似南宮嗜茗癖似鴻漸此可以得君之為人矣余與君生同庚志同方而先考功與御

史又同榜也蓋通家者累世矣知君之深宜莫如余宸若
明將葬君於世墓儼焉衰經拜且乞言於余而持歛石一
具為贄余乃液墨於石撰斯文焉銘曰
劍埋豐獄兮神闕厥竒劍氣干霄兮厥光陸離一躍而出
兮銛不可逼出非其時兮匣之不試一試而決予疇嬰其
鋒一決而折兮與鉛刀同嗟兮神物兮不在人間知者信
希予佩者亦艱君而有知兮猶按劍於地下君而不死兮
尚反魂於大冶前乎千秋兮出君于延平之津後乎千秋
兮索君于淮水之濱

明故鄉進士荆吳馬君墓志銘

萬曆己卯南畿大比士吾邑入彀者五人而馬君與焉此
五人者並以文藝稱雄一時號赫奕矣乃人之評馬君者
又不獨豔其文蓋疊疊譚其行云馬氏世誦于貲君復不
問生產居可三四徙愈徙愈陋卒不克具一椽而僦屋以
棲瓶恒無儲衿不蔽肘許語交謫若弗聞也者枵腹而出
陟顛而獨吟意軒如也視金若賸姍友問遺即一介亦辨
諸義謁客必度飯後或值方飯時急縮足避去主人疾招
之弗返也遇貴人一長揖外絕不作媿阿態對客縱論侃
侃無所避力不能鬻一書而假讀於友已又輒返之默誦
甚習得之難故誦之良苦也其所著時義俊逸清婉綠貧
益工見謂可屈其羣而試輒殿貴耳者遂下其品目鮮有
延諸塾者君亦恥於干人歲甘家食即延之其金不登人

什之二君嘗為子聘婦有成議矣未幾而子痿婦家有懟言君曰吾豈忍以病子誤若息邪亟持庚帖反之不索所聘既絕婚而痿者復起內戚有繫獄而告饑者君脫絮袍易米與之無難色噫嘻貧麗六極楊韓二儒且欲逐而送者也而士人緣此折氣卑、不自好者不少君不幸生即罹之厥志彌勵厥守彌堅竟其生無一鄙瑣行宣聖以無怨為難無諂為可若君者詎徒無諂且不屑以彼易此蓋幾於樂矣無怨云乎哉即古之狷士君又何讓焉君父名芹里中謹厚人也布衣而有士行有司廉其人列名旌善一旦橫罹瘦死於獄君既長而審其寃自禰驚烏子以志恨不知者誤呼為荆吳君亦遂應以荆吳失其意矣君歎

庶鳴而歸蒼頭而鮮衣者數人羅侍之君曰若等者何虜曰願事主耳君曰吾故吾耳應門一五尺猶懼食指煩也悉謝却之乃鮮衣者賄其家故在也君遂憤、病瘖不汗五日卒而鮮衣者始大悔踉蹌竄去報捷之旦君入市携米二升以歸將作糜而急脚至矣東西行負擔者亦息肩戟手仰天謝曰彼蒼果有知邪於是多金而藉勢者乘其匱且費持金強納之比聞訃不旋踵大索而噪噫此可以觀世情矣君低徊鄉校者餘二十年僅一戰而捷、未再月而殞慶者在門弔者在閭矣天既厄之又胡畀之才邪既成之晚又胡速奪之也客不以問天而問余、應之曰列子有言厚于德薄于命君命則奇矣第亦死不第亦死

等死耳不第而死世孰知有馬生者天能以一第報其德而亦不能自違其定也其死也可悲其第也可瞑已君諱鳳字瑞夫世為支塘人後徙邑治之南為邑人嫡母沈母朱元配再配皆張姓三配錢某官兩石公女也子男一桂徵娶沈女一嫁徐孫男女各一生於嘉靖辛卯年七月卒以第之年十月二十九日年四十有九銘曰
其生不辰其行則純厚積而發乍融而湮疾于電光榮若朝菌於乎馬君古之薦行今之畸人

明故建寧府經應南塢陳公繼配郭孺人墓志銘

經府南塢陳公繼室郭孺人以萬曆甲戌三月二十三日卒距公之亡蓋二十五年所云孺人與余室人兄弟也故耳其懿行甚習厥孤士先斬焉乘經不遠四舍兩及余門而謁之銘余悽焉傷之詎忍錄諸郭故澄江著姓太學起潛翁寔亢厥宗孺人其異女也翁訓之嚴口授內則女誡諸書孺人誦其詞且繹其義思異日乞蹈之矣性敏而婉在同氣間獨鍾愛于翁矢不以配凡子無何翁卒會南塢公業有聲辟雍喪元配張孺人廉孺人賢遂委禽焉即翁尚無恙為慎所選良無踰於公者張遺藐諸孤蓋纍々四人又堂有兩姑老矣孺人事尊以禮撫幼以慈諸孤且長為脫簪解佩以成其子傾嫁時裝以遣其女無世俗後母態而諸孤望孺人深猶以薄俗訝之豈至仁者無恩邪乃南塢則曰幸哉吾獲若人不爾幾罔以為家於是公謁選

得建寧挾鴛人往郡幕秩卑建故劇郡公以才自見出入
戴星日僕、庭下賴鴛人無內顧憂比歸鴛人相公更三
年喪者再公好客、至輒呼酒浮白舞袖歌鍾接轄見跋
咄嗟立辨者由孺人主其饋也公卒未幾而里人陷以管
庫之後二雛甫雛襁褓弗克任門外事于是棄家從長子
士元避數百里外冀可幸免乃邑大夫逮其姪任焉前時
食客有可為之緩頰者罔一憐之較所靡金更什伯於不
避者鴛人返則宿儲罄矣田廬易主矣僦居城南蕭然環
堵日督士先以學又屈於力弗克具脩脯以謁明師即士
先勉佔畢期不負若母而內困於治生外困于禦侮幾廢
學矣余則嘉其志也鴛人生於正德丙寅五月十九日享

年六十有九張鴛人子男一即士元武岡州吏目娶呂繼
季女三武進周增無錫胡獻可同邑沈汝謙其壻也鴛人
子男二士光娶曹後家於曹士先娶湯女亦三適郁贊承
宙孫季鳴孫男七人曰上箴娶徐曰餘芳曰餘慶未聘曰
所聞聘郁曰所見聘卞曰所知未聘曰所得聘章孫女七
人一適張文懿一適李可繼一適邢光宗一適潘洪德一
字葛餘未行曾孫男一曰大有聘承曾孫女二長字徐次
未字汝謙暨宙文懿可繼並學官弟子員鴛人母何故戶
部郎益義公女依鴛人以老余與公僚壻也間歲輒過從
公拜之猶及覩公赫奕時門有軒車座有絲竹遺書在笥
積鏹在庾而忽焉蕩諸鴛人苑、食貧于菱舍祿仕者不

百川先生集 卷之十
獲就其養。離母者不獲盡其歡。其殆以憂卒邪。向微士先
死不晚矣。葬以萬曆四年十二月二十六日。從公之兆。昔
公之葬。余嘗志之。而詳其世。茲不書同穴也。銘曰
公之存。兮共際其安。公之逝。兮獨罹其艱。生不克齊。其年
而歿。歸其原。吁嗟乎。孺人德門。淋媛。

陳夢白繼室錢孺人墓志銘

陳君於石。當其母錢孺人大耄之年。乞言於余。以承啜菽
之歡。余頷焉未償也。無何。孺人卒。君遂以志墓。請而厥意
彌勤。豈信余之言。但足以不朽其母邪。夫余既不克張其
生。又負其死。誅諾責者莫庸逭矣。錢之先當 高皇時。謙
齋先生。甦以宿儒薦。撰祭元幼主文。以獻當上。意欲官之。

懇辭還山。五傳為稼隱君麟。生樂靜君雷。咸克世其業。
孺人王父之也。乃陳之守拙。君紀者。雅與稼隱君善。並以
耆。莫重於鄉。當是時。守拙孫夢白君。用錫秦贅於張。天
未續也。而樂靜君向為女擇所配。簡斥者數矣。故孺人踰
笄而始歸。夢白云。既歸。則舅若姑已蚤世家。四壁立。張遺
孤者二。方仰哺。孺人當在室業。已勤。女紅能勞。勤無純
綺雜珮之好。於是短衣力作。凡麻枲組績。自蓄盜漿井臼
之役。晝夜勤十指不休。手為之龜。而夢白忘貧矣。饘粥外
間。靡以周。姍黨伯兄病瘡。且殆。女兄嫠而食貧。君憐而飲
食之。醫禱之人皆義。夢白君實孺人成之也。未幾。夢白君
卒於石。方髫年。次全更幼。孺人家益削。內無強近之援。外

無葭莩之賙而卒焉喪葬如禮不以菲廢於石稍長孺人
指篋書泣且諭之曰此汝家恒產第讀之即未能取青紫
庶不媿家風也故孺人課兩兒嚴甚祈寒暑雨必嗾使就
塾夜則熒々一篝燈母子聚首刀尺呶語之聲交達于戶
外乙巳辛酉歲大歉餐珠爨桂環其廬者多委瘠溝壑孺
人孱然一身卒克保聚雜野蔬糠粃潛以自噎日持所織
衽市米以舖二子不使少有饑色此於石所最痛而言之
輒涕者也孺人勞心勞形什倍恒母子有婦矣趨而代之
或諷之自愛而孺人曰僕々如故也乃今於石以端謹稱
臣室爭賓之歲藉其入可具甘滑以報其劬且登上壽謂
天有知非邪先是隣不戒於火延及寢矣孺人入抱其女

欲與避烈焰四張竟不可出於石奔自塾狂叫恟眾排墻
出之母女胥無恙意豈惟若子孝感哉殆有天意焉孺人
以弘治乙卯七月十六日生以萬曆己卯四月二十七日
卒壽八十有五子男三長仕娶孫張出次即于石名介娶
周繼許二氏並出儒門克嗣徽音者也次全娶繆孺人出
女二張出者適周孺人出者適孫々男女各四于石卜以
某年月日葬孺人於興福世墓之右與夢白君合志孺人
而不詳陳之世者同穴故也銘曰

彼婦兮繡襦阿母兮鶉衣彼婦子充閭阿母兮蝸廬維勤
與劬兮罔悅以愉勤以補匱兮劬以植孤植孤兮遺澤訓
孤兮遺書母長往兮孤胡弗思

百川先生集 卷之十
先室郭孺人墓誌銘

郭故澄江著姓而起潛先生龍尤個儻豪舉能亢其宗姍
黨避後者多伏田於其藉先生善奕名冠江左稱國手卒
業南雍時大司馬喬公廉其儒而藝數賓之幕中甚驩也
喬入為冢宰且挾先生以行擬授以京秩而先生暴殂矣
縣吏按籍連中以臣役而昔所伏田者又胡越視之家遂
蕩幾罔克以生先生娶於何為民部正郎孟義公女絕乳
生孺人先生嘗過從先大父繕部公遊余可四歲出而拜
之先生撫余曰此郎不凡可婚也遂往聘而諾焉於是吾
母念孺人食貧迎之以歸待年於室時僅十齡云吾母心
憐之若已女又莊貌臨之若嚴師孺人乍脫慈母而日侍

嚴姑乃柔嘉醇謹可教也凡組績鍼繡刀尺機杼諸女紅
之事凡盥漿自蓄井臼烹飪諸勤婦之事一効其孤耳之
所提目之所睨即會心不忘無俟再教又數年及笄始成
嘉禮孺人則以素所聞者相余而余藉以無內顧余時攻
舉子叢遺書讀之晝夜居於外孺人亦晝夜侍吾母相偶
當夕歲若雙星詎徒賢于鷄鳴并燕寢廢之矣吾母患瘍
者再呻吟反側穢不可邇會余應試兩都孺人躬藥餌保
抱為羣婢先一飯一溷非孺人則無當吾母心他婦或在
侍弗使前也日所具梁肉上者以進吾母次者以膳夫若
子又次者意以自給復念女婢之勤者舉盃授之竟不一
入脣也孺人于歸弗克具橐裝以從且能甘其夫之貧平

百川先生集 卷之十
生無綺縠之衣金珠之飾姊如間耀首華躬以形之孺人不恥並立已後勤生畜用銖積寸累幾與之埒同乳兄弟三四人咸以役故漂異域歲相過存來者亦久不言去孺人輒衣食之無倦色頻行復贈之俾各得意去以為常孺人當余中歲即為廣嗣計蓄二妻且飾之以進卒無子而孺人所生兒竟克有立今膝前兩孫皆其遺也豈天為之報邪余拙於治生而孺人相以儉勤日率羣婢治麻枲車軋杵軸間夜則篝一燈而環之縫紉紡績衡數不登不止也其起也常先人卧常後人而家人化之無敢惰者使孺人而至今存也余何患貧哉孺人善病迎醫召巫幾無虛歲乃不以病遑自暇逸余每偕計別遺之金以備藥貲孺

人輒移以市麻枲木棉之屬病作則忍之耳其勤苦類若此歲乙未余落第還舟中遭妖夢之夕孺人病彌留矣亟歸不數日卒其卒也執吾母手連呼阿家阿家婦不孝弗克終事阿家而反令老人幾邪聞者莫不隕泣始吾母之當其少也御之嚴晚而感其百順不類他婦更卯翼之比其死也言及輒為之慟孺人生於正德丁丑九月五日卒於嘉靖乙未五月九日年四十有三子男一延嘉娶陳氏太常少卿陳公女之三長適王維藩邑庠生次適徐應圻太學生又次則妾劉氏出未諾孫男二胤教聘桑氏別駕守白公孫繼聘秦氏太學生玉泉君女胤伽聘秦氏邑庠生景陽君女當孺人之亡余方強仕議續者紛如也緬

念尹閔之賢而履霜絮蘆不免遺譏藐焉遺孤甫失所恃而俾遭虐於代者余心之謂何遂一切謝之以營婚嫁婚嫁畢而余且荏苒以老非敢以義自詭不忍忘于逝者耳茲卜某年月日葬孺人於先塋之昭虛其旁以待余夫葬而誌以掩幽詒後禮也在古多誌其妻者黔婁之死則妻且誌之夫婦交誌亦後死者責也余與孺人偕幾三十年其苦辛憂勤有人不能言不敢言者誰則知之即余不文又安用假手為也遂飲泣而敘其槩且伸悼亡之痛系之以銘之曰

嗟之孺人天胡合之異壤而婚天胡離之中道而分其少也屯孤女兮食貧其歸也屯勞婦兮茹辛蓋有終身之瘁

而罔一日之寧嗟之孺人胡爾生之不辰爾之亡兮我悲爾之賢兮我銘百年偕老兮爾不可作已千秋同穴兮爾其俟於冥之

冢男延嘉墓志

天乎痛哉胡奪吾兒之速先余而逝耶余與室郭孺人偕者蓋二十有六年而僅育兒女者三未成殤者無論也三人者首王氏女次吾兒次徐氏女兒與徐女先後亡矣即一二側室皆弗子側室亦先後亡矣孤鰥獨余無之矣余其天壤間畸人邪非邪兒亡時蓋有兩孫焉長僅五齡次甫逾晬不勝喪也今兩孫者能揖拜矣可無失禮于賓矣於是奉吾母繆太孺人聯吾室郭孺人柩尾則紉吾兒以

從而歸諸墓念吾兒匪貴匪賢法不得銘固敢乞言於綴
文之家而舐犢之情良不忍已為之敘其志云兒質似未
甚魯髫年授之書即易上口比長教之績文援筆時許輒
成以呈題意良不謬而純駁相半追琢之可不失觀美余
手錄經史諸子粹語兒讀之畧遍亦能取裁應試有司者
四郡縣咸不落後比臺試輒在孫山外時入彀者多勢家
子阿父賤且貧胡能伸吾兒耶兒亦憤然自奮不子夜不
輟錄偕同志結社相切礪矢不以韋布視息人世兩目病
眊而讀如故兒亦勤矣不死或有立也兒在稚年業無童
心游俠者擯弗與交即設餌誘之亦不染余拙於謀生兒
頗纖蓄以相余弱冠任家督晝則移功應門戶夜復自課
補之不敢惰余私幸無後顧憂矣解吳興司理歸悉挈管
鑰畀焉自許作湖山一逸老而曷意其先余逝也嗚呼傷
哉兒嘗自信人患無志耳有能專問學操奇贏必可逐貧
去賤故為之不遺餘力而不知是有命在暨兩事胥不效
竟抱鬱以殂疾且草囑二子于其婦曰善視之豈未究之
志猶責償于後人耶兒孫姓名延嘉字爾減與之交者以
余故呼為游川子生於嘉靖甲辰六月八日卒於隆慶壬
申十一月二十五日年二十有九娶陳氏太常卿兩亭公
女子男二胤教聘桑氏別駕守白公孫太學碧海君女繼
聘秦氏太學玉泉君女胤伽聘秦氏庠生景陽君女嗚呼
兒不應銘之亦忍不哀之耶乃籲天而哭曰

百川先生集卷之十
嗚呼天祝予耶天祝予耶韶年者先化而頽齡者幸存耶
化者長已矣存者詎能久耶余哀吾兒蓋肝催腸裂痛莫
云喻矣余三十而抱子未六十而喪之丈夫生而世間不
可不成之業兒一切遜之不能為丈夫未死而人間不可
不了之緣兒又一切棄之不及為乃俾余息肩之年更為
負擔之始兩雛未知學余代兒教之未婚余代兒締之余
生而孤無父無怙晚而任父累者再世天乎天乎胡逸汝
以死而勞我以生乎兒如有知弗瞑矣余口不阿堵手不
牙籌而強之猥鎖歲輒減產幾無以為家而其神亦憊矣
首皤齒墮不堪關世矣繼今上養予耄下撫二孱爾孤嫠
又代之矣兒如有知弗瞑矣三喪纍々迤邐周道余前哭
吾母則後失若母繼喪若母又後失吾兒涕泗橫溢兩袂
交積哀感行路矧余廷夫兒如有知弗瞑矣庶幾哉天幸
懃遺少須臾無死及覩婚媾更抱曾玄余年日久兒魄日
安而祖而母共茲樂丘骨肉歸土永言相依嗚呼兒可瞑
矣

亡女二姐壙誌

悲哉死生之際也有知之屬莫不愛其類而況於人耶而
況于所生耶夫殯而死則生者無愛也厚饗而死則死者
無懃也吾女非殯也非厚饗也殆以幽憂死耶余老矣兒
女僅三人往年喪吾兒茲又哭吾女余其天壤之畸人邪
死者則長已矣生者之痛曷其有已耶吾女孫姓父吳興

百川先生集 卷之十
司理母郭孺人兄一女兄一以女兄故名二氣清德醇敏
睿特甚少侍余讀及余有所撰述入耳即不忘而遂能識
竒字解文義羣從就傳者不逮也每旦誦金剛般若心經
及三官經數過則就室組績非呼不出尔九齡喪母而鞠
於祖母余婚嫁不越里中女方孕而同年家太學王君已
指腹約暨女以丑刻婉而王即以寅刻申前語後數年而
王氏子殤於是同里議姻者數矣卜輒不吉家後太倉徐
氏議輒吉歲戊辰余方與上計者偕就南宮試乃吳中訖
傳秀女事一夕而婚者且萬家于是吾女遂歸於徐未笄
也徐郎髮可覆首耳徐富厚再世矣歲賈于燕齊間息恒
什之三積而不散徐郎無父兄之訓詩書之漸遂土視其

金而市中諸少年謀射其好以為利裘馬鷹犬擣搯蹴踘
之戲龍陽下蔡之惑無虛日又入貲為南國子生南俠兒
藪也博局平康設餌以須而徐郎遂淪胥矣吾女諳女誡
女傳諸書殉順夫之義又雅知乖性不敢諫間亦諷之弗
聽也徐郎既倦遊而歸索逋者踵至鬻家具以償又不足
遂鬻其居卑棲數椽不克飽其室人吾女亦甘之即對泣
牛衣中矢無相棄也而徐郎旦復逐諸少年以嬉夜則挾
所私於隔垣羣不逞者若蠅聚羶徐郎惟恐失容胠篋垂
橐以供一夕歡或繞床大叫或據案大截即餅無宿春金
無晨炊弗問也咄嗟少緩則詈罵內子甚或批其頰今爪
痕尚在也而吾女病矣所須藥糜不時得厥翁若姑亦雖

其乎而遷於媳若秦越人然余又以境外弗克數、視遣
女奴往累日僅得一報漸以彌留余駭焉迎吾女歸就藥
禱蓋四旬矣而竟不可活嗚呼痛哉天乎鮮子嗣若余者
而復忍奪之乎豈曩日之卜神亦謬余乎順婦道也吾女
乃以順蕩產且速其殞乎將命懸於天莫之追乎抑冥有
指負必不使婦於同里而必使遠死於徐也嗚呼痛哉有
生而若余遭也安用生哉吾女絕命時口占詩數首余僅
志其二大都閔孤怨生之語文姬之拍烏孫之悲憤隗人
失所配者自古然矣余既為之殯復輿柩歸于徐而忍淚
書此俾納之壙中女生於嘉靖辛亥六月三日卒于萬曆
戊寅三月十二日年二十有八子二人申壽三壽徐郎名

應圻少吾女三歲家已四壁立余罔知其所終云卒之又
明日父禹中子枚淚誤

明故山東道監察御史守愚朱公行狀

士之脂韋嗜進屢躡屢前若蠅之逐羶罔避揮斥即末路
漏盡矣猶屹々伺便投機不饜不噫豈盛麗之能溺人
耶亦人之自溺耶余以槩於守愚先生朱公其鷄群之鶴
與公策名且三十年服官僅數載軒冕在躬視同桎梏惟
脫去之不亟是懼豈其果於自好漠然于斯世耶當其時
柄人者羅天下之士悉出其門士一為所涅恒隳厥守公
思同之則病民異之則病已故寧位之不崇勲之不樹埋
跡遜野潔名全身以老是上指之識漆園之訓也不然公

嘗三仕郡縣再入臺省咸恪共乃職斯經世之才有國者
所急須也而肯甘自廢若此耶公卒之數年二子光若輝
躋余門而乞言焉將藉手以獻于當世之立言者以文其
隨首之石余之姑公弟之室也故余自少日游公之門迺
辱忘年折節待以國士慚負知己罔可報稱胡敢拒斯後
哉謹撫括涖官禔身之大都且以表其悃云公身不踰中
人言訥、若不出諸口而壯圖遠志髫年則然厥考都水
公無祿公年十七鉅役奄至產且日圯公以元宗繩武自
矢抱遺書投郡中何山寺張帷殿旁手披口哦竟夕不眠
久之讀所携書畧盡自課時義日可十四五首公業自負
可以角天下士矣於是出邑庠晉太學大司成陸文裕公

竒其文擢寘第一歲戊子領順天鄉薦乃六上春官甲辰
始舉進士時公期以博洽自命思覽異書棄帖括不視而
竟以時業復第高等其向對于何山深矣筮仕山東昌樂
令昌樂故斥鹵民貧俗悍多椎埋草竊且當孔道使輅相
望令無暖席公迺禁酗勸耕緩征節徭期月市無囂聲野
無惰力暇則進諸生與之講德程藝彬、乎西京渤海之
治矣部使入境他邑持牒者輒叩首請曰必質成昌樂令
死無恨乃昌樂絕無訟者其訟者多他邑民也薦剡交上
未及報政召入拜南臺御史巡上江按部皖城方登壇閱
武聞湯孺人訃揮衆奔歸幾踊奠祭具如禮既免喪喟然
吁曰爵以榮親祿以藉養今二親亡矣曷用仕為雅不欲

行勸駕者促之行兩就道矣又兩輒返同年瞿文懿公強
挾以行再拜山東道御史掌院周公器重之推攝四道庶
綏若々縉紳榮焉會時相側目諸臺中毛舉細故遂不附
己者忽逮治公幾斃杖下出判鄭州公單車赴鄭渡濠梁
幾覆尋反風幸免唐子方之濟清淮也曷異哉天之護直
臣類若此公在鄭履卑引分一無懟心事遜其長常自署
曰吾職判也巡院孫公素兄事公諸利病興草密詢公々
為之畫多罷行之其陰利於豫民者不可殫述居無何兩
浙軍興當道忖公檄使治兵於浙鄭人戀々卧輒不使行
擁輿前後復舁入城公諭遣之乃克疾馳去比至浙量移
遂安令礦盜嘯聚格殺捕者變幾叵測公曰歲比不登羣

不逞利錙銖謀朝夕耳毋自劾勦以滋異心遂承檄駐節
山下諭以禍福盜羅拜頰上懽聲雷動曰匪朱侯吾屬魚
肉矣即解散君子謂是役也官不頓兵民不殞命全睦救
寧仁人一言賢於數萬師遠矣尋遷敘州府貳守過家上
冢遂堅卧不起謂所親曰吳蜀相距且萬里洞庭驚波褒
斜閣道古今危之矣徃日之再仕也吾方悔焉豈今昔異
情耶銓人而授我以遠郡匪遷之直錮之耳吾志決矣客
勸之出輒飲以醇酎即未開口度其意將齒及者公預持
觴々之令噤勿言夫待遷客者不泥常調若鬱馱乍炎其
徑尤捷同公而謫者今幾人下位耶使公稍抑情徇俗豈
終銀青已哉於是日召所與遊者觴咏談笑荀輿葦航綸

中亭服漁樵者數於湖山間遇之乃鳴騶枉駕者擯弗納也性踈朗無鈎深計或架臺深池或築室荒野僅取適一時未幾垣頽椽摧置不問田宅便利者購之無金常餘錢數千緡歲出子息持券者至即償以所購以故兩世起家進士而庾無儲粟籬無遺金殯堂半紀鬻產襄事在官之操可徵已公雖不克贍一家而澤及三黨外家鄒去城一舍公歲展其墓讌其族若乃遜宅于同堂之兄公產於異母之弟迎養貧姊之死為之殯厚奩少妹之死撫其孤接友以敬馭僕以慈公之無所不厚若此兩與鎖院甄錄悉名士在南北臺所表薦去登名卿者數人前後建白轍焚其草一不箴副公不斲人知人亦莫之知也公諱木字子

喬先都水公號古愚遂自號守愚識孝思也生於和治壬戌正月二十六日卒於隆慶戊辰八月六日享年六十有七母鄒氏繼母湯氏配鄒氏郡守近齋公女繼盧氏方伯三渠公姪孫女再繼李氏宮保文安公族孫女貳室尤氏子男二長德光太學生娶別駕濱湖王公女尤出次德輝娶安陸令言泉連公孫女李出二子世其家學恂之類公女三長適庠生王應元盧出次適太學生何錡尤出次諾大司成琴溪陳公孫欽光李出孫男六長學顏娶大中丞虞山陳公孫女次學曾聘太學生譚鑑湖女次學思聘經閩沈紹葵女次學益聘郡守育菴葛公女次學閔聘鄉進士何雍山女次學仲未聘孫女一未諾德光出鞠甥王諾

百川先生集 卷之十
泰和令東洲縵公孫繩祖曾孫女三俱幼未聘學顏出墓
在世寵之西北隅公手自式廓二子且奉柩妥魄焉遵遺
令也公世家常熟橫瀝之上入國朝有晚翠先生學博行
脩衰然為學者師晚翠生益章益章生慎齋公之大父也
昔郡守葵軒沈公受業晚翠雅與益章善爰館慎齋為甥
朱之城居也自慎齋始迄今又五傳矣

明故晉寧州同知山城王公行狀

王在天下最蕃大都錫姓並出姬後常熟之王稱臣宗者
五六家公族其一也勝國時六世祖裕仕為學錄故邑稱
學錄王為諸王別裕生慶、五子家少者紀繹、生室、
未有嗣時業已育再從子瑠為後號一訥翁而翁之本生

則祖紀而父寬也翁襟度豁如雅志詩畫少游石田沈先
生之門晚後精究養生遂通醫理里中迄今稱為長者娶
章氏和治戊午五月廿一日生公沈先生為繪海榴復系
詩以贈且貽書曰公門世德後必有昌者昌自此兒始矣
公生而挺異神骨健聳不類凡兒未晬即能行立年十六
七許一訥翁患羸疾猶撻家政而賦實繁受侮不少公方
精詣舉子輒廢書歎曰生兒貴代老乃徒日事佔畢以家
累延父耶遂長跪白翁曰大人嗣今無庸念家為兒請悉
任之於是夜則闔戶劬書晝則出門應務銳志自矢事各
瞻舉嘉靖壬午督學御史蕭公校士選補邑庠生已而同
進者被流語御史覆試之公文更入高等已酉遵例北游

百川先生集卷之十一
太學而一訥翁歿公無程弼奔喪葬以禮猶以不及視含
為終天恨每當祭未嘗不齎之涕下也戊子辛卯兩試不
第公輒自恨曰不第固吾分但慙負王師耳王師者大司
成永嘉鶴山先生雅知公者也公自是遂絕意榮進杜門
讀班馬書及唐宋諸大家集與鴻儒評騭媿之竟日夕不
休甲午大比或勸之行嘆曰母氏老矣安忍以身外浮名
復貽有涯戚哉明年章孺人果病歿公每晨起稽首北辰
祈以身代籲天之罔聞焉會西鄰不戒于火勢張甚公拊
棺而歎仰天以呼它弗之問其廬密邇而火竟不及謂孝
感非耶公居第無華構而經營先壠餘二十年費逾千金
爽塏幽勝為一邑最時二子太學君肥鄉君尚就外傳公

即設講席於壠上令聯業其中歲延名儒主其塾雖厚幣
罔恡一日呼二君前語之曰汝祖年僅踰艾吾德薄于父
而年已過之所以未委家政者正恐汝輩妨所業耳俟河
之清人壽幾何及吾未耄雖沾一命亦可藉以報國乃謁
選銓部選法以出身為甲乙先科次貢次則例是日就試
者若干人而科貢者二十六人吏侍葛公得公卷謂為科
甲遺雋超真十二得沅州判官前一夕公夢天墮一繖中
而分之手持人頭者三繖為官蓋今則判之沅以水為三
以元為頭古有夢三刀加一刀而得益州者公何殊焉便
程抵舍會倭夷不靖三吳繹騷邑議建城巨室各畫地授
後而臺門重居厥費最鉅公得西門山麓高下石頑土踈

致工尤難董役者復雷厲亟成公值囊罄且邁痰疾或諷
盡往丐免公謂徃役義也人々以貧病免則事孰與濟遂
倉皇稱貸取辦役完而疾亦尋愈始克抵沅々遠在湖南
自麻陽作難民困兵燹督撫三省都臺開府在焉賞賚供
億日出無紀公預為儲侍應時調教苗夷阿項之變軍興
彌年募兵無慮萬人日仰食縣官公典餉繩々不絕項旋
就擒有蒲甲者罪應徙度不可追求以賄免門吏素嚴公
不為通甲乃自懷金伏伺丙夜入階下公方秉燭閱簿書
驚而叱之甲備道所以叩首請命公佯諾令持金出明日
竟按如律并杖閹者自是沆謠有王公清如鏡平如秤之
語公嘗攝巡捕渠魁楊先二越獄以逃公晨捐俸懸賞格

比晚獲之庭詬諸邏者曰我誠逃當無獲理懼上累王公
故不即長徃耳豈若曹能踪跡我耶先是宦於沆者廚廩
悉取給里甲有不保其產者公至一切却之曰民困極矣
豈復堪此耶吾寧任矯廩之誚弗恤也同官醜正日與長
吏謀中傷之竟不得其隙乙卯肥鄉君領應天薦公且倦
於仕矣乞歸甚力而上官不允越明年而有晉寧之命晉
寧去吳益遠公堅不欲徃邂逅親宦強諭以行非其志也
公至即攝其篆曰是州地僻務簡大非沆比安用紛更為
哉乃悉從其俗日惟一開門視事暇則偕學博遊昆明池
上選勝賦詩民咸稱便而州亦大治有段唐二宦爭田不
相下幾致大獄公履畝均授訟言遂息晉賀長至節事峻

即投紱以歸自笑曰萬里羈人今得老故園矣邑中鄉大夫里居者輒結耆英社會公與焉觴咏之暇復課二子程督之嚴不減壠上時也嘗謂太學君曰汝五試不收殆學未充歟抑見未廣歟辟雍賢關吾昔所藉以切磋而壯志未伸飲恨何極汝盍游焉以快吾恨乎壬戌肥鄉君舉進士宰肥鄉迎公之徘徊州縣間於吏事肥鄉君既奉教於退食而且分祿以盡一日之養歡可知也居無何公忽念家不置語肥鄉君曰吾僂翼之鳥惟懷故林耳矧宦邸有親日營三釜亦無養廉法也吾其遄歸矣肥鄉君頓首泣留不聽既抵舟又數顧僕語曰兒勤甚瘠且次骨奈何輒吁嗟久之還家未數日故恙大舉寢食並廢竟以癸亥七月

月廿一日卒享年六十有四向使公歸計少緩將疾作縣齋旅襯江滸孰與考終牖下豈神實促之耶公天植坦易與人交任真率分無城府邊幅遇貴人不能為俛仰之態下逮厮養亦不加以倨容始若落落久之不渝其初也奉身儉德不妄靡一錢而睦姻周乏樂施無難色外父家落不支廩之終身厚為棺斂母家章以縱蕩破產則收養其老穉晨夕待公以舉火周氏姊以愛女出適裝資幾產之半姊之夫數被酒虐公之上意承母氏下念終鮮兄弟待之坦如也少師事強齋徐先生先生致政食貧公歲時遺問逮老執弟子禮無異侍函丈時也其薦於姻故類若此公名魯字某山城其號也配孫鶴人余從姊相公拮据益

起其家先公若干年卒子男二嘉謀即太學君娶聞氏嘉言即肥鄉君娶龔氏繼范氏孫男七維藩維垣維翰維寧聞出維屏龔出維城維岳范出藩邑庠生娶余女垣娶盛漢陽郡守劍崖公女屏娶余姪女翰聘張贛州郡守立齋公曾孫女寧聘顧庠生二江君女城聘趙廣東少叅益齋公孫鄉進士定宇君女岳聘朱監察御史守愚公女孫女四一諾鴻臚寺序班劉見苓子某聞出一諾浙江少叅徐鳳竹孫某一諾潮州二守錢濟川孫某一諾廣東鹽課司提舉陳太湖孫某范出曾孫男二女一二君以嘉靖乙丑年三月六日奉公柩權厝於虞山迤西之祖塋竢得卜以葬行且乞言名筆用昭不朽爰以狀文見屬顧余不文無能為役然竊自念王孫世姬擬古朱陳比櫛聯居通家累代知公之深者宜莫如余憶自總州辱公忘年折節推以國士今愧乎其言復傷徽音永邈杖屨莫何從遂繹思其睦家涖官之大都而為之銓次如右嗚呼學以明經不必其名之成仕以適用不必其位之尊知公者亦可以罔愧矣乃今鳳雛颺起蘭孫林立所以繼公之志而食天之報者將不在於斯乎伏惟立言君子采其蕪詞錫以華撰庶幾文曰人重人以文傳俾後世有知公者則豈徒二君之幸已邪謹狀

先考混之府君行狀

當先考府君之卒也不肖棲未周五齡梓僅彌五月云不

肖猶未知哀母繆太孺人晝夜哭亦晝夜幾僅孺子慕耳
稍有知統母膝問父安在母告之故相抱而慟自是始能
哀矣既而就識吾父者問父何狀云而貌酷似之不肖攬
鏡輒掩泣嗟、天乎委蛻存而委形何之乎又遍叩父所
與遊者云而父質家敏日所諷書可數千言三四過即默
誦不遺間過友氏夜談是時學人鮮業曲臺禮者業之易
第吾父故業尚書歆其言凌曉執禮經從開卷讀之日未
禺中且及檀弓之半矣友氏試之甚習又非徒獵之者大
異其敏謂子若是穎耶何難五車即一第曷足盡子鬻文
客持郡試新義數篇示之將索善價吾父給曰余業先得
矣歸即繹之以較客所持不謬也吾父撰時藝援筆立就
散不蓄稿不肖緇故篋間得一二泣而讀之益信友氏所
期當不妄恨天奪其年有司未之舉也時吾曾大父暨大
父再世在堂吾父席其阼門以外一切不關罔所表樹而
家行益脩孝於祖若父友于弟妹慈於羣下吾母嘗條舉
數端告不肖不肖幼且歲彌久不能盡憶也執友語其恂
恂長厚和煦可親貌與德俱不應天先是里中大疫家之
人無不染者窳後中吾父不汗數日卒既卒而疫者俱瘥
嗚呼痛哉吾父殆其一身以贖百人者耶寔正德庚辰五
月二十七日也其生為弘治丙辰八月八日年僅二十有
五去今六十餘載矣當年襁中兒若不肖等敢克樹是異
將不免於水火無論遺書也乃今不肖棲叨列一第登一

命而梓亦廩於校官需次於公車內外孫曾可二十餘人
詎不肖之能耶殆天厄其父而稍報於其子耳乃不肖自
顧無異凡兒弗克躋高位徽龍章以賁泉壤而幸食其不
盡之報罪矣極矣按家乘吾孫之家於吳也當趙宋南遷
始入國朝自先考功府君而下又繼別為宗起家科甲登
名仕藉者五世矣吾父為封承德郎西川府君冢孫為繕
部郎雲津府君冢子于小宗為適長母贈安人盛氏吾父
諱一元字混之配吾母繆太孺人其行在別狀中子男二
孫男三孫女七曾孫男五曾孫女三子孫婚家姓氏胥吾
父卒後事亦具吾母狀中曩吾父之葬吾大父主之隧首
之石缺然未銘以有待也茲不肖等奉吾母之柩合窆焉
敢次其所知如右以徼惠於立言君子倘錫一字之褒即
吾父短折于生前而庶以不朽於身後將萬世後子孫無
敢忘云

先妣繆太孺人行狀

嗚呼痛哉吾母之恩且勤于兩不肖者豈人間凡母可倫
哉生我者母也而成我教我蓋有父道矣有師道矣乃其
秉節礪操餘六十年如一日較古之貞臣與獨行之士有
過無不及焉茲又居然一大丈夫矣而忽焉薨逝不肖等
號天踊地五內欲裂附耳而呼弗聞也升屋而復弗反也
痛何可言耶嗚呼母果遽已乎哉不肖所為報於母者萬
不得一母之所食報於天者百不得一而遽已乎哉幾欲

殉母冥漠以効芻靈之後復念逝者疇與薶穉者疇與撫
猶強顏於地上罪通天矣乃于居廬之日繹母竒節懿行
條之如左且謁世之名能文者而丐一言以為寵庶藉以
不朽云爾母繆姓思省先生之女吾大父繕部府君與先
生同袍時甚驩也命先考委禽焉年十七於歸而先祖妣
盛安人已無祿即世事繼姑徐安人徐安人年等吾母吾
母不以少故廢婦禮先大父未第時歲為人塾賓先考業
舉子輒事以往吾母相徐安人事先曾大父封主事府君
曾大父御家嚴家人少當意者顧獨謂吾母曰其吾家能
婦乎可以徵教矣先大父舉進士在告居無何而先考卒
吾母年甫二十有五不肖樓未周五齡梓生僅彌五月吾

母即矢志靡他闔戶屏膏沐晝夜幾不棄心累日乃克進
糜幾死者數矣當是時樓牽裾而泣梓索乳而啼母懷一
兒膝一兒且泣且言曰微汝輩吾何用生為吾不生汝輩
亦惡能生我今與二雛生死俱矣於是殉節為緩植孤為
重此其一念天實臨之以至於今而母子之命長相為依
矣既襄事即移閨靜室以居復飾精舍以禮諸佛每旦焚
名香合掌膜拜無慮數十百不休夜復綴長明燈熒々不
絕暇則率羣婢治麻枲攻縫紉日衡月程即敲暑祁寒罔
間曾大父嘉其行不以孫媳呼之而輒呼以媪意將老之
以勵其志云不肖等齒漸長母望日深獨不肖頑不奉教
善逐羣兒戲母不以孤鷄故稍假借數煩夏楚新舊癢痕

百川先生集卷之十一
三
隱：膚草已又擲杖而慟曰癡兒一至此耶吾豈不汝惜
汝而無成負我矣復令我負汝父矣不肖惕於其言自是
折節教遺書而讀之出門交一時之後若今閣學嚴公故
宗伯瞿公而下數君子與之結社講德談藝吾母廉不肖
所與遊者皆若而人也為之色喜不肖趨庭寘訓降心接
分而三益過從吾母則中饋必親務極豐腆出以享客庶
幾一言之教雖古之斷髮供饌芳躅可繼不肖嘗與客奕
吾母潛聞落子亟索其具投之井客惶恐竄去自後門無
雜賓座無燕僻其所辛勤十指歲入竒羨始則靡于束脩
解珮媵黨問餽者什之六晚則罄於奉佛飯僧鬻衢建梁
者什之四且曰倘果報不爽當福及爾曹吾老矣無他望

矣性嚴重居恒無笑容不肖等率婦子入侍必候其喜愠
之色不敢先發一言不肖等既寇且踰壯矣有小不善吾
母未嘗不詬詈之或長跪良久乃叱起門內肅如家人高
嗃奴耕婢織罔不事：中門內外無敢闌出入者其或不
共則叱咤鞭朴小過不貸少選復念其勤而酒肉之此其
衷本直諒仁恕而性則剛毅凜然絕無婦人媿媿態
蓋不如是則安能勵不可奪之節六十年如一日也豈不
卓然大丈夫哉夫捐軀于一旦堅持於終身難易較然矣
吾母獨於家難者任之誑惟我孫宗祊賴之以綿而累世
遺經亦藉以不墜其恩且勤於兩不肖者即天地不足擬
其高厚也先正大中丞虞山陳公正嘉間名臣也一日不

介於主人條登我堂北面再拜不肖倉皇倒屣迎且謝公
 公嘆曰太夫人之貞若是太夫人之教子若是豈惟一門
 繫吾里之光余心欽久矣敢不敬拜顧養無外交不得挹
 其容而禮之乃乘主未行遙展此心耳不肖頓首謝且入
 以告吾母吾母亦從中堂再拜命不肖出以傳謝陳公而
 陳公復遣子從不肖遊受經學且命之曰夫々也家矩可
 師也自是或授之粲或侑以珍果頻致存問不肖等入以
 告曰陳公今之賢者米果之惠伯夷所樹敢以獻吾母慰
 而喜曰不圖藐諸孤之獲交於大君子也如此不圖尊貴
 人之屈禮於嫠婦也如此郡守春臺蔡公邑宰澤山馮公
 龍津張公廉其行高先後具羊酒禮幣以旌且揭扁於門

用為世勸吾母輒或不肖等曰夫死而保其遺孤婦職宜
 爾也奈何市吾夫以徼名哉嗣今若等慎勿關於有司以
 益老婦之醜且吾所聞觀有陽若無改節而不免浮議者
 亦冒殊典吾其醜之不屑與為伍也不肖跪而諾曰謹受
 教樓時已幸捷秋試幾異日具官於朝積歲循資或天語
 一言之褒則母節可揚而母意亦不拂卒之七戰春闈幾
 捷者四而俱為當事者所擯久之不一麾為遠臣而又不能
 其官例當移左勢須遠惡將之固難舍之不忍遂棄繻不
 行而與母相晨夕者餘十年所母無離憂子無遠憶蓋不
 知天壤間更可易此樂否也而忽焉薨逝痛哉吾母豐肌
 山立亦鮮疾噉飯不減少壯即百歲可異也第以薦信

因果絕鮮食者五十年不肖等強諫百端不聽竟以脾疾

卒之時其神不亂其色愈澤不淚不怖含笑待盡可謂

得正而斃矣父思省先生諱奎邑庠生母劉氏外家胤絕

母迎劉養之終身死殯而葬之歲時蒸嘗於寢仍命不肖

等曰第以畢吾年耳異日母使混於孫宗也生于弘治丙

辰三月二十五日卒於萬曆辛巳八月七日享年八十有

六子男二樓吳興司理娶江陰郭氏梓儒學廩生娶徐氏

二婦俱先卒育女一適鄧光祖孫男三延嘉樓出先卒娶

陳氏太常少卿雨亭公女延祥娶談氏太學鑑湖君女延

平娶瞿氏梓出孫女七一適王太學水簾君子維藩邑庠

生一適太學生徐應圻一未諾樓出一適郡守愛鶴陳公

子琦太學生一適學博顧豫川子寅賓太學生一適何廷

禎一適封太常少卿心椿陳公子燦梓出曾孫男五胤教

聘桑別駕守白公孫繼聘秦太學玉泉君女胤伽聘秦庠

生景陽君女胤奭聘王庠生琴洲君女餘幼曾孫女三一

諾錢太學敬齋君子其餘幼嗚呼痛哉吾母婚八年而娶

六十二年而同穴婦道克盡如吾母者完璧無瑕可以

下見吾父於九原矣子道之虧如不肖等萬罪未償胡以

復見天下士耶此中夜所以掩泣而沒齒為之負愧者也

伏惟哀之而錫以佳傳俾後世永有聞焉則不肖等萬罪

庶可少逭乎爾樓無任哀痛祈懇之至

張烈婦誄有序

夫死者人必至之期貞者天不朽之理知其所必至則何
休于死全其所不朽則何羨於生烈婦張也可以死矣烈
婦者故閭閻寡子也無保傅以提其躬無詩書以漸其耳
而秉貞性成完節天薦方夫少君出汲徐吾借光日寄命
於糜餽歲仰資於杆軸而白璧自將紅顏為祟乃有狂且
目送道旁心挑窓下於是投梭竟歸斷機不顧我則削迹
彼罔悛心夫何編荆易決於踰垣繩樞豈固于排闥孤嫠
入夜奮柔腕而抗捺戈狂踞徹天招比隣以撻制挺卒之
牛口不汗蠅矢無點烈婦猶以辱身辱名其醜等耳匪天
曷以明吾志匪死曷以請天閻積薪室中蘊火榻下服故
衣以為襪示不復生紉敝帷而若繭期莫可竄從容就義

慷慨獨裁怒憤結而玉質自摧鬱收張而瓊枝半燬既剝
膚而剝韜亦震躬而震隣救焚至集滅熾為燼未能逃死
徒爾殘形遂使焦灼於炎敲楚不堪忍蜿蜒於床第毒則
備嘗已復涕蘄懿親堅謝醫藥越十有八日而卒寔萬曆
甲戌六月念又四日也嗚呼生無重堂之護竟啟寇心沒
則虐敵之投痛深冤骨并白日操而拮据並作膏沐晨謝
而苦辛百罹傷哉貧也良可悼已在昔宋姬以傅母不在
而不下其堂梁姑以兄子不出而還燎於室崑玉俱熱今
古同烈吾聞其語今觀其人可無言乎為之誄曰
迪惟勾吳泰伯荒之端委而治文教始基繫焉游氏北學
魯尼吾道以南戶敦書詩一解詎惟丈夫亦越閨秀詎惟

高門亦越圭竇淋哉張婦貞一天授有狐綏之匪寇婚媾
 二解一拒投杆再拒闔扉我守愈嚴彼狂愈滋決我糜虐
 驀我中閨露刃而迫奪靡以麾三解疇謂孤嫠不畏強禦
 義以鼓勇志則帥氣白璧彌堅玄珠固類四解寇既遁只
 我則志只視身若讎生亦愧只五解積薪厝火寢焉自焚
 祝融相之鞭燄驅熏下燭九地上燭層雲六解彼截者髮
 彼刎者耳金刀試裁毀厥一體我志用彰宛焉不死嗟唯
 婦兮慘毒備矣七解豈不爾思亦溺亦懸之脫於梁溺拯
 於淵男子之手我不死焉何如一炬僅存遺骸螻蛄罔罟
 烏鳶曷食八解胡救焚者莫解予情不息我以死而強我
 以生不快我一朝而困我再旬覆用為虐匪曰予恩九解
 嗚呼彼婦之死與烟俱滅伊人之亡若火斯烈肉則腐朽
 馨于蘭荃殞命崇朝流芳永年百骸俱殘寸心獨全十解
 惟火之焚岡韡玉石惟婦之赫斯表玉德死之三日風顛
 雨橫木拔禾偃海溢川騰豈婦之憤天為震驚十一解二
 烈往已婦也克紹曾不三紀再樹風教女傳伊始邠金之
 子續而書之以俟彤史十二解

自艾賦

伊沕穆之不佞澆風競而違醇爰有季子機上之嫂翟公
 門外之賓昔余覽於紀事悵史氏之罔真繫宇內吾同胞
 雖胡越而若親矧殷勤于杯酒復系屬乎人倫顧昨歡而
 今讎條番覆乎兩雲迺叢書而不怡謂傳疑其云之胡古

百川先生集卷之十
鑿之非遐余忽邁乎厥身悲騷裏之在樵羗鳥鏡之與隣
距吻肆其搏筮吃哮恣其憑陵媿雌伏之奈何惟自訟其
不辰亦頻看乎鏡中誑長守夫賤貧彼徒厚於多積吾將
富於多文風大鵬之扶搖安復計茲蚤蚤噫吁哉居諸去
兮不再來強仕及兮華髮新晚知學兮莫自愛光陰惜予
爭寸分湯作賦兮揭座右用代耳提之諄々

刻孫百川先生詩集

明海虞百川孫樓子虛父著

同邑邵昌鋤耕夫父選次

梁溪子壻華滋蕃伯昌父校閱

五言古詩

詩杖吟具十咏次韻

青藜六尺強支我老生瘦坐嘯忽相遺行吟復相守曳月
袖影偏咏雪指寒透百錢挂我前一瓢挑我後板槁特々
聲上下水龍鬪

詩履

高會恒阻陰雙履買市匠危梁惴欲巔岑山奮奚讓雨中

百川先生集 卷之十一
兩脚泥風前一庭響偃背行思遲掀髯立吟朗肩聳白雲
中齒印青苔上脫之戶內來歡笑共抵掌

詩笠

欲製竹皮寇漁郎帽為則戴之庇一身行矣訪三益不妨
日在頭已免塵棲額風陌鬢載歌花迳首頻側却笑朝簪
人此寇未應得

詩囊

錢囊乃守虜酒囊亦狂流何如我詩囊佩之日與遊鳥聲
綠樹深驢背青山幽珠玉心中嘔風光筆底收不愁阿母
嗔每倩奚奴負平叶牀頭括其口防有偷兒偷

詩船

吾宅水雲鄉圖書捆而載一葉未為小五湖詎云大鼓枻
相和鳴停撓不求快花期待明發榜人已風或浪遊海天
寬豈入喧市隘浮蹤共間鷗中流信行邁

詩枕

貴人玉為枕錦帳鈎珊瑚山人石為枕癯骨安窮途午風
眠北窓秋月卧澄湖閉目得佳句玉枕有此無夢去蝶非
蝶覺來吾喪吾如何黑甜裡忽聞軍將呼

詩筒

知音眇千里詩成誰與通曾寓殷使君浮沉敗公事截竹
貯瑤篇便鴻得郵吏飛翰走脩途急脚勤泛使我徃渠亦
來何異面相計那知崑崙使乃屬淇園子

百川先生集 卷之十一
詩窩

卜築遠塵境卑棲絕市囂冬夏此偃息風月任弄朝跼如
蠶居繭安必鷓棲巢不見爨烟起但聞歌聲高威鳳隱在
阿孤鶴鳴于皋夜來四壁隘睡裡伸其腰

詩壇

吾聞大將壇層臺壘高土建牙赤幟中羣雄悉推武詩家
亦推轂詩律嚴自古一曲萬人敵岳音那敢伍少陵乃擅
場謫仙可開府一從大曆還兵散不復補

詩草

三百變騷選門戶各一家吮毫揮楮生錦心吐菁華此道
一以關荆募日梳爬懸鑑爭妍嗤攻玉辨瑜瑕價高洛陽
紙滌灑如刈麻數行相公筆珍重碧紗遮

贈蔣愛隱

姬仲鞏虞鄉代有高蹈者君抗不事節棲遲翠微下萬玉
圍精廬誅茅陋陶瓦古今蔣迳同羊裘跡逾窻如何晏倩
生却云隱金馬

燕都送二川牀南還

薄祿不易干遊子未言歸者理蘭楫居者念萱闈將予
懷鄉淚灑君還鄉衣棲心緒方洽去住情各違分張決茲
日徘徊延落暉豈無姻交在謂以懿親非莫目燕越邈頓
使信音稀寄語倚門人勿憶忘家兒

將赴春試留別山中諸子

百川先生集 卷之十一
胡馬嘶北風越鳥栖南枝物情怵土性人意懷親私嗟予
振南羽邈風飛北陸干彼五斗祿裹我三月齋慚非賈董
才況乏金張知狗監進自恥買臣貴難期玄陰逼歲杪勸
駕不我遲平生契金石茲當長別離願因南風競遺音慰
遐思倘予結綬日是子彈冠時草堂會借隱莫續北山移
文成自慨

有女手織之飛鍼習流黃剪裁何勻圓尺度宜短長所志
共天孫與帝縫袞裳薄命生貧家女紅無自將短衫巧莫
施窄袖不成妝欲浣布襦垢易之柰空箱十指餬其口賴
彼多金孃笄年逼婚期召以治衣裝篝燈不停手達曙候
熹光製畢仍高持俛首呈重堂嬌兒嗔不語猶嫌未精良
嗟之此括婦辛苦為誰忙

守約益君歲書於樓扁曰玉輝詩以贈之

孔壁聖秘啓汲冢靈詮抽七畧名已邈五厄爛不收君家
富緗素度之重檐樓朱甍敞綺䟽絳帷揭纖鈎不以貯歌
舞爰乃工吟謳琅函耀璀璨瑤軸麗雕鏤兼輞擬茂光滿
架夸鄴侯文光貫奎壁虹氣干斗牛却疑羣玉府忽在三
江頭珠淵白光發劍津赤烟浮矧茲授神契具闡邃古幽
君既發其藏歸然聚如丘英華一以咀醅粕旋為留書淫
任時銷錢癖非吾流予亦劬書子玄覽思披搜家藏篋易
盡閱肆市無儔何當入帳中遺珎恣探偷寶光豈獨賁餘
輝賚交遊

十四夜月

我有愛月癖未暮首東嚮老蟾若解人飛馭慰所仰乍離
滄渤東旋印瑤穹上高玉鏡懸湛金波漾繁星掩微
茫輕雲掃纖障皓魄雖未覩茲夕已幾望萬籟寂希聲羣
物各呈狀犬驚人未眠雞喔天若亮掩關顧影孤持杯逐
情放丙夜睫轉明終夕懷乃暢來宵豈無歡陰翳或生愴
余雅交於新涇石室父子間蓋餘三十年所矣頃辱
石室再過情款藹如緒言所及文采翩而且過自
謙抑不以賓禮自居卅風家教茲焉益徵爰贈鄙言
以叙風誼無伸久要云爾

憶昔少年遊伐木歌求友結交新涇公寘昧媿非偶意氣
各凌雲諧情共杯酒占泉墜玄涇膠庠駿奔走五常眉家
良八龍或稱首越壤百里間參商隔邠酉長空嶺頭雲那
攀門外柳俛仰三十年相晤忽成叟竭來千里駒卅誼情
彌厚已看玉樹成曾覩瓊枝秀蘭芬襲室中木屑霏座右
因知生謝遲詎肯居王後羨子標英風覺我形穢醜我非
長嘯者御李自茲覩顏母金玉音遐心棄衰朽

壽海涯族妣六十

吾宗二千指彬稱多賢科名卅不乏詩禮代相傳妣也
挺竒表山立偉而前幹蠱奪儒業雅志戀林泉耆英結長
社文酒日留連室有甕頭春出拄杖頭錢柳塘任浴泛花
陽輒醉眠婦翁既金紫婦弟仍木天富貴安足羨吾自飽

百川先生集卷之十一
吾饘奚必千箱貲安用萬頃田有酒吾事足無辱此身全
優游花甲周顏朱髮尚玄人間家難者何如多歷年願姊
自今始閱世等彭錢

送太史趙定宇北上三首

有美偉丈夫粹質侔璠璣文追麟趾前詩擬建安初竭從
玉堂歸卜築邇吾廬論交匪昕夕講德綿居諸予心永焉
托君意良亦愉何當王程迫雲泥路各殊執手河之干送
送登徵車

其二

停車古道旁持杯獻霞漿憶昨猶公隣今茲邈參商行

豈無朋新交後他鄉君行日以邁予也遙相望恨無垂天
翼相翔之翔方願言遺德音曰風慰離腸還際明昌期披
衷事 聖王

其三

聖王右文儒玉署接承明君昔聞詞賦一戰霸羣英相君
求識面兒童亦知名還山蒺藜書窮搜咀其精干將久不
試出匣神光驚論臣異常調榮足公與卿茲行盍勉旃崇
勲嗣阿衡

遊露臺山居

捫蘿下高岑綠崖四三曲徑仄人迹稀林深鳥聲續礧石
激流泉松影挂斜旭耽幽入彌深厯險氣逾促悠然隔凡

百川先生集卷之十一
境恍若在監谷區中別有天樹杪忽見屋清磬度風來長
襜倚雲矗平臺堪振衣繩牀且息足茶烟一縷青焦光半
窓綠老衲歌翻貝禮客手作肅茗椀漱清芬香爐供餘馥
偶此浮生閒已受無量福塵心苦未斷夕陽墮西麓前岡
路已迷漫共歸樵逐

七言古詩

詠楊花

隋堤之上青春老樹：傷春歌啼鳥落紅一夜逐東風又
見晴空柳綿攪斜翻繡幕半鈎輕細撲瑤櫺一叢小低隨
流水漾波中高入層樓舞雲表可憐紫陌豔陽時雪花撒
遍遊人道顛狂聚散西復東應亂冥迷夜還曉忽訝雲鬟
鬢有絲俄驚霞袂衣成縞謝家庭外總難名學士堂前不
堪掃柳花飛柳枝裊陌頭不覺春歸早明日堤邊聽語鶯
萍葉參差滿溪遶

讀世說

華林園內蝦蟆幾八王噉盡典午肉雲擾中原國十六翠
華南駐土一掬生縛降王剝面郎却借金陵作黃屋小朝
活得草莽間新亭北望封疆感舌戰雄爭四座服溱園宇
字籌軍國殷憂誰是卧薪人畢竟神州付沉陸擊楫子年
何促運甓翁顛易禿還將輕薄兒強乘當年軸長江南北
是通津豈是長江限南北

愛雪詩

君不見昔年雪堂中人老寒亦熱又不見今年雪堂中人
去愁堪絕一年一度雪還飛人去胡為不復歸嗟君見雪
如見親西風吹鬢白於銀扶藜看山，失青爐前進酒四
座春此時六花紛若塵愛日愛雪兒情真何當晴旭迴一
輪瓊英化作簷溜零回首高堂跡已陳吁嗟乎滕六神但
使阿翁衝雪歸甘作袁安僵卧身

山中雜言贈嚴陵趙翁

浙有隱君子結廬依翠微柱笏爽氣入迎簷秀色圍碧桃
窓下鳥聲亂黃葉門前人跡稀秋霜足芋栗春雨多蒹葭
寒梅山中友夏荷山中衣歲華幾見花開落塵世那知誰
是非枕上來禽語亭前看鶴歸鼓琴一片石垂絲三尺磯
歷，前峰七十二朝來惟有白雲飛樵歌唱方合牧笛音
初稀杳藹雪中路推敲月下扉子陵千載空遺跡好訪羊
裘失莫違

次韻惜花春起早

錦桃乍吐媽紅萼薄倖東風惱花落曉鶯無奈隔窓啼驚
起開簾響鈴索鳳鞋浥露芳徑來晨裝鹵莽拋玉臺海棠
昨夜飛何處賸有茶縻勒未開

次韻愛月夜眠遲

紅妝乍洗鈿釵卸坐對三星詠良夜茗花漸熟月漸高
清輝半吐輕雲罽深更影掛銀河千玉露篩風羅袖寒促步

百川先生集 卷之十一
床頭猶不寐幾迴歎枕捲簾看

次韻掬水月在手

磯邊嗽玉吞還吐蟾光倒浸清
虛府柔荑雙捧玉鏡團
二金釵明可數流珠飛濺浣春葱
圓缺盈虧一霎中
莫道女郎嬌不奈十尖擎出水晶宮

次韻弄花香滿衣

子規啼血聲急戲折花枝嗅還立
將紅擷紫麗春園晞露含房繡襦濕
滿頭簪却返蘭堂羸得氤氳結洞房何事
井欄生馥郁美人昨夜浣衣裳

詠荆軻

祖龍奴六王矧爾燕太子亡秦詎無謀
胡恃尺八七七首

未入函谷關可憐先殺將軍樊燕讎
未滅秦讐滅身後茫茫計何拙
易水西歌已淒刺客雙化羸
途泥遼水東枝已窮父子恩深那復容
君不見黃金臺成樂生赴七十齊城
一朝破吁嗟太子之謀一何誤

梧庭四時雜詠贈錢羽士

玄都飛盡桃花雨梧葉乍抽如翠羽
碧陰隱約搖春風黃庭讀罷揮唵塵
子晉吹簫月下來鳳凰棲向步虛臺
遙知玉女彈碁後倚笛相和唱落梅

乳泉百折流松壑入戶雙舞白鶴如
簧鶯語葉重玉蓉依稀出前閣
桐花零落蕊珠香瑞腦烟消日正長
窓紗樹斜侵綠不隔蟬聲到石床

霜花夜合秋草死梧葉紛、打窓紙三更何處踰玄猿瘦
影蕭騷月明裏風、雨、近重陽曼玉敲金紙帳涼半掩
洞門人寂靜琉璃燈下禮虛皇
落葉門前人跡絕虬枝凍玉黃昏雪青牛仙駕阻函關庭
下饑鳥啄瓊屑窸封相對泛流霞醉舞踰躑劍鍰花繞樹
飛鳶棲不定掃來烹出鳳團茶

海翁宅內讌觀舞對者

栢臺甲夜開春酒內宴葭蓼集堂後博山一縷香氤氳玉
笋紛、送纖手絳花翦蠟四座明豈粥初熬薦新韭粉面
重、夾兩行鳳鞋促步巡燕走麗詞一曲囀鶯聲十四妖
姬金鳳釵此時賓主歡未終調笑方諧呼大斗擢揄一片
地衣紅洞房雙躍腰如柳按節小垂復大垂翻身迴左旋
迴右掌中蟻折霞袂搖簾前燕掠雲裾紐駢肩顧影參復
差掉屣凌風無侶有仰天折磬月兩彎匝地磨盤雪雙肘
簇花偃仰骨亦柔弱態歲蕤喉欲吼昭陽姊妹競新粧湘
浦英皇躡長袖交甫曾逢漢水濱劉郎今遇桃源口曲終
樂闋歛霓裳還捧賓卮為賓壽吁嗟人生行樂須及時白
晝勞、幾邠酉重門秉燭卜夜歡莫遣他年空皓首

壽田叟

黃鸝樹、朱明候煖風著人如醉酒里中春社鼓方歇又
向翁家上翁壽黃金曾未入翁手黃流亦未吸翁口一犁
恒業付兒孫草食木衣宮半畝男能耕子女能織漁為賓

百川先生集 卷之十一
予牧為友催科夜卧戶不驚床頭新釀還盈缶由來近市
饒喧囂巧敗何如翁拙守靖節歸來慕葛天三閭畢竟輸
五柳君不見道旁名利控紛々馬上一生空白首

警世二首效白樂天體

古人謁貴持清吟今人謁貴持千金千金一擲良可惜貴
人門外金如織投金換得方寸紙仰視重堂真赫爾貴人
按籍諭詮臣此輩咸須給告身朝衫乍著習拜舞縉紳一
時恥與伍官家鬻爵政紀失畢竟一錢不曾得長安馬上
意氣雄此時方信金之功癡兒復望榮且久頻索金來頻
上壽金兮難繼貴人怒須吏逐出春明路垂橐歸來寐莫
居方悔從前不讀書

貴人金不辭世人持金趨箕歛聚一家海內必耗虛四顧
帑藏溢盡是民膏脂貴人晝夜宴高臺醉裡傳呼唱落梅
退朝狎客迎門譽排闥隄人候柝開自詫金多銷不盡百
年長樂無悲哀一朝難作赴東市金乎金乎安在哉

贈太學陳抱冲之金陵

君不見鄧林自古羣林藪上千青霄陰百畝虬幹扶踈滋
露華隱約龍鱗寸無朽萬夫牽挽汗千牛持獻明堂匠師
手棟梁椽桶惟所施被以文繡蒙雕鏤又不見渥洼神駒
品第一過都應塊電光疾五花散彩塵不飛疑是房星天
上逸宛人致之充上駟叩首長嘶失羣匹霜蹄踏遍八荒
雲赤鬣高張汗流血東吳文學今鄒魯咄々陳君志千古

百川先生集 卷之十一
孔璋便作七子雄省華況是三老父一朝辭家觀國賓長
步金陵入天府古來養士惟太學木之鄧林馬之渥園橋
億萬松麟鳳執經三五俱鸞鷟天子慎選師儒臣羣玉
搜羅付追琢楊雄閣上爭問竒馬融帳後無陳樂梗楠督
墨屬公翰駸裊調羈歸伯樂陳君英名應更顯腹笥羣經
筆騷選紅雲馬上誰敢先赤幟園中我獨搴金陵鬱
帝王氣形勝寰中稱百二六堂山脚對雞鳴萬雉石頭雄
虎踞丈夫豈是汗漫遊經術由來可經世吊古遙為六代
悲籌今更獻千秋計秋風秋月清且明勝地名賢兩相遇
奚囊到處有新篇惠我山中長短句

五言律詩

送邑博汪存吾擢推東昌一首次王陽谷韻

貢子彈冠後逢時羨拂纓登雲仙客渺落月故人情岍柳
春猶弱江雷夜忽聲勉旃樹勛業竚爾入承明

陸蕙田自郡來訪因而止宿話舊

纖雨淹行李論心已隔年夜樽開范約寒榻拂陳懸燭暗
知長語甚深欲廢眠壯懷君未暮贈玉羨新篇

登浮圖

側足上危梯諸天忽可躋遙看三島近高入五雲低開教
龍祠北傳經鸞頰西蕭梁大同歲隆棟仰朱題

寄題張樂玄清懶窩

一室靜不掃寸心本湛如見賓忘束帶避俗且移居身隱

長安市門多長者車尚存文字癖日著帳中書

守拙詩

僕利嗟今俗倥侗羨古風守雌河上老抱甕漢陰翁樗櫟
千秋社鷄豚半畝宮前岡車馬道嗤彼沒塵中

臨北虞先生穴二首

薄命空殫缺斯文修蓋棺青檀一生恨黃土百年安客劍
懸殘樹樵鑿入斷垣翻令後死者休復悞儒冠
僑鬼猶他縣枯骸已故山清魂夜不寐玄室晝長關薄殮
衣仍白雄心鬢未斑高原摠宿草一望一潛

丁卯立秋日極暑二首

河朔思逃暑江南喜報秋驕陽方北陸大火且西流蟬語

雲屯樹烏棲月墮樓却疑窮島外縮地到炎洲
赫日驅三伏炎氛匝六虛滌煩須對局得睡且看書氣入
金風薄威存赤帝餘年華坐消歇莫訝鬢毛疎

渡江

鼓柁沿江澣羣山帶郭斜遙看廣陵樹翻憶故園花帆影
懸前浦鉦聲隔遠沙金波浴明月人母有乘槎

崑山道中

十載舊遊處今來尚故吾岍楓迎旭媚江柳著秋疎城郭
猶雄縣兵戈且畏途玄都誰道士桃樹已栽無

讌梁少白宅聽吳中新樂羣至半山橋

瑤席開仙樂銀燈剪絳花合歡羅上彥分部闢名家連袂

百川先生集 卷之十一
歌相卷飛觥興轉賒如何逢永夜皎月易為斜

送文井沈子遊西湖有序

丁未仲秋文井沈子邀彼騷客覽勝錢塘匪徒眷矚
景光抑亦吊懷今古昔馬遷博洽亦藉方遊向秀風
流乃志玄覽山水之助有由然者沈子秀穎天朗芳
藻霞綺却掃作賦云已有年乃今甫聽越客之誇輒
動山陰之興其雅志可徵也余將齒讓胄子恥不克
從爰賦二章為別

客路縈蕪沒採蘭持贈君言從武林去飛思轉殷勤江上
流清月山頭飛白雲秦淮吹笛慶南北愴離羣

弭楫津亭下涼風怯素秋旅鴻猶北度吳客况南州詩滿

山中寺歌連湖上樓清樽遲君返聽裡湯同遊

六月三十日對酒

歲去忽強半人生同逝波杯中但浮綠鏡裡任侵蟠商氣
秋猶弱炎颺暑未和只將新節序都付醉鄉過

八客詠有序

周之兼天下之士出於客而客之類又有八焉律以
古悉敵民也作八客詠

俠客

玉勒紫駟嘶青樓赴夜期叵羅醉公子條脫賞妖姬一語
讐須報千金諾不移朱門輒馳入七貴搃新知

食客

百川先生集卷之十一
負士不自飽王門日曳裾盜裘甘作狗彈缺莫無魚一飯
恩非薄千人食自如平原多上客報主是誰歟

刺客

罷酒東戎裝追風鳥共翔九關嚴甲帳一將殞胡床
血猶濕英名骨亦香歸來報知己先獻觸骸囊

說客

長揖復通名詞鋒四座驚三軍聽前却七國任縱橫
舌戰千人敵胸屯百勝兵轅門上羸馬縫掖一鯨生

狎客

排闥何須刺不冠仍不迎踏青春並戀浮白夜傳觥
唯言無忤依態有情王孫嗟落魄爾汝各卿

丹客

大藥無何有誰云石可金一聞方士語輒動鄙夫心
火鍊千年閱雲封百日深先生已休矣飛跡杳難尋

估客

竒貨居浮宅錐刀競所之牙籌困守虜金穴誤癡兒
入息收三倍操贏射一時祇曰生事大不唱鷓鴣詞

博客

却笑豬奴戲還同蠅利忙擅場惟六博失業已千箱
得雉旋推局呼盧快繞床尚餘豪士氣北里選名倡

將入京逢遷客南歸

逐客春明路斜陽匹馬遲回瞻天關近遙指海雲迷去國

百川先生集 卷之十一
三千里懷鄉十二時熙朝人自獻嗟爾負心期
省中高會圖

學士臨文酒詞源壑海濤北門才子集東閣相公招五斗
醒方解千言興轉豪義人索新句醉墨遍鮫綃

余以病不克北行遂有嘲而侮之者故作此以慨
弱齡懷遠志壯歲失初圖獻璞剖猶刑償金得更誣家貧
思作吏名賤悔為儒劍匣中宵啟晶光探有無
藉草朝仍卧編荆晝亦關有杯怡惡抱無藥駐顏顏身毋
浮沉裏人情反復間徒將丈夫志都付淚潛
僻性非諧俗迂謀合受貧典衣延去客岍憤揖來賓藥裹
身猶病圖書道自尊龍潛吾已矣不羨蠖求伸

送酒日沾醉賣文時得錢黃金從去手華髮任盈顛混世
惟知白迹羣且覈玄燕臺倘招士不獨郭隗賢

初晤觀海王子于閣老養翁席上因贈

與子不相識情生傾蓋時金蘭如舊雨玉屑有新詩言別
君何易論交我自遲平章相公宅從此憶襟期

候選書懷二首

獻賦來金馬公車日待徵積薪淹漢藉抱瑟倚齊庭客裡
易頭白交中誰眼青何當珠桂日長此滯居停
萬里辭吾土一枝懷上林相看仍野服同學盡朝簪捧檄
情應喜程書力未任只須兼吏隱幸不廢清吟

燕都月

帝里可憐宵虛庭桂子飄開軒燈影暗警道柝聲遙月魄
幾圓缺羈懷祇寂寥懸知相念者共仰一輪高

西山道中

上國春偏麗西郊更可憐輕塵花半藉交道柳初眠綠樹
鶯聲外青山馬首前那知京洛近別有小吳天

移寓奉常公館即事

玉署喜遷喬端居絕市囂虛堂明几潤清樾翠陰交客裡
一枝穩江東千里遙自慚猿鶴質却入鳳鸞巢

徐三橋作思補齋落成小讌二首

損祿成新築開樽延故人圖書四壁富花木一庭春密雨
停歸騎深杯薦細鱗清狂還自適抵掌岬綸巾

情晤語偏長同心遇異方憐余愁似海藉爾醉為鄉遲日
砧聲靜薰風花氣涼斜陽低屋角猶自倚胡床

七月望夜

不寐攬衣起瑤穹欲二更月當三五夜家隔幾千程魚柝
傳金漏蟾輝散玉城徘徊成獨嘯瘦影弔孤形

憶母

往日亦相離何曾久不還偶思心欲折無語淚頻潛鏡裡
愁添白堂前夢舞斑邇來衰更甚只記別時顏

寄弟

我自離家日誰同定寢時忽聞鴻雁叫欲廢鵲鴝詩母氏
勞偏養兒曹教莫私茅齋讀書處青草滿春池

久客

歛爾涼風至南冠不奈吹鄉心車下載客鬢鏡中絲謁貴
無懷刺歸人每贈詩買臣年已及猶在負薪時

湖上與莫雲卿舟宴得青字

淞景移文侶蘭橈午輟停帆前雙鳥白鏡裡數峰青繁吹
歌聲合深雲野色冥年來謝杯酒那可獨為醒

喜吳興朱海陵文學見訪

舊雨湖天隔歡携數別年一燈徐孺榻千里子猷船政自
慚予拙文猶憶爾妍莫將歸棹促楊閣可談玄

與朱海陵登大石山房作

閣道盤紆入青蘿手自攀人來紫霞裡僧在翠微間遠岫

疑含霧斜陽欲枕山樽前有文侶未可下禪關

夜賞玉蘭作

檻外燈為幄庭前玉作花清芬墮瑤席素影上窓紗客侶
高陽會人如杜曲家為憐春夜短莫問月將斜

和齊之秣山中即事

曛日携文侶幽探芳徑賒鳥啼雲外樹香度塢中花旛影
上方寺雞聲何處家斜陽挂高閣逝景不勝嗟

與陸蕙田夜坐

一樽雙白髮相對各依然把袂欣今夕披襟憶往年灼薪
談舊雨刻漏課新篇歸棹休嗟晚堅冰正滿川

立夏前一日秉燭偕美人花下作二首

九春消泚景五夜作春遊人意憐今夕花容及未秋歌聲
風外度燈影月中流達曙延芳讌殘更奈戍樓
亦知時易去況復夜將闌人悵春同老花憐月共殘倚欄
愁不奈感物酒為歡且幸桃腮侍移燈帶笑看

沈嘉則枉齋中

高駕停茲日芳 仰昔年女言霏座上衰髻識燈前款戶
勞題字居亭媿草玄更期江棹返惠我遠遊篇

題杜以庸芥舟卷

芥丛一舟小仍將舟作廬吾身原不繫大地亦為虛破浪
非浮宅停橈且著書焦先橋下室方此復何如

雪夜齋中與陸蕙田校書作

凍雨空飛素寒齋入覈玄燈前雙白髮座右幾青編茗熟
竹爐火蘭添石鼎烟論心共茲夕握手是新年

携馮山人山莊竟日次其韻一首

言別已三載詩盟猶未寒匏樽今得客芟服久辭官白鳥
烟中沒青螺兩後看解衣共盪礴莫問日將殘

雪夜陸蕙田遠顧

長卿憐病肺却酒只呼茶忽枉高人駕言賓隱吏家綺疏
飛玉蕊銀燭剪瑤花湯憶朱顏日相看兩鬢華

吳興舟中秋望志感

日照一江水雲開四面山鬢同黃葉老身異白鷗閒故友
青雲上吾鄉翠靄間冥鴻杳然去浪跡未能攀

憶尚湖

却憶西湖上澄波宛鏡中短橈蘆荻月長嘯芰荷風浮碧
三千頃來青十二峰如何薛暉賞三載跡飄蓬

答同年胡翼聖次其韻

雪滿龍城暮表生只凍眠忽來雲外素欲締社中緣淮水
去不返陽春自可傳共持風雅調繼軌建安前

南歸席上留別兩亭年丈

彌歲欣情洽脩途忽遠征斷羣同旅雁出谷想遷鶯宵燕
牽離緒晨鷄促去旌却憐明夜月孤影隔瑤京
去住情俱黯燕吳道正湯片雲鄉望切零露客衣單未擬
還家樂仍悲行路難平生不解飲今夕盡君歡

病暑逢立秋二首

一歲逝將半三秋茲乍逢快辭炎帝令欣滌大王風且濟
相如渴應甘阮籍窮塞帷宵氣入新月漏疎櫳
苦熱正難避新秋喜乍歸乳蛩迎露泣一葉候風飛未惜
年華逝還憐暑氣微東家有勤婦戴月搗寒衣

題遂初弟藤谿草堂二首

別墅翦荒徑幽居愜素心陟岡雙阮屐挂壁一陶琴地僻
無人跡林深但鳥音突烟常不舉時聽數清吟
孤村臨異境數畝自為宮憑几聽流水開軒入近峰桑麻
課園子禾黍話田翁此地堪遺世漁舟莫更通

五言排律

送給諫兩亭陳年丈赴 召

烏踰龍忽化丹詔鳳初頒聖主茲膺籙孤臣盡賜環瑞麟
須在藪文豹豈藏山憶爾懷忠直先朝拜佞姦一封荷恩
謹千里幸生還課子裘能紹怡親服舞斑酒邊啣帝澤夢
裡侍天顏選勝舟春泛娛文戶晝關雲冥鴻自遠雷奮蟄
俱翔日月重輝映塵氛淨宇寰肘懸新墨綬身綴舊清班
楓陛晨趨熟薇垣夜直閒履綦珠粲鳴珮玉珊珊風來
巖三殿霜威帽八蠻馮唐年未老汲孺驚難踰青瑣聲逾
重蒼生病乃瘳還攄素心赤莫遣皂囊啟捧檄情偏喜離
歌涕共潛披襟從此判飛鳥若為攀湯賦河梁什無憂仕
路艱朝回想鷗鳥應念海翁閒

送從姊齊之卒業南靡并應秋試

南國帝王宅東膠奎壁躔園槁觀億萬禮樂搃三千洙泗
分芹水圖書聚木天設且羅國俊懸鼓入時賢姊也吾宗
彥今為胄子員德溫方玉潤談藻噴珠妍董傳懷三榮伏
生傳百篇五經全笥腹一笈半橫肩霜刃明吳劍雲程快
祖鞭十年憐蠖屈一日待鵬舉丹桂秋香滿清輝月魄圓
馬馳天廐駿人羨帝都仙吾道將亨矣茲行盍勉旃泥金
傳莫後璞玉獻當先觀國遊雖壯辭家意可憐竹林吾念
籍碁墅爾懷玄落日催離宴深雲隔去船何時覈玄自相
對竹床眠

謝瞿昆翁惠米

未得休糧術仍慚授粲賢長安珠似米漢闕帝如天誰念
饑方翔君思飽鄭虔故人分月祿負士績晨饘轅金塵初
滌意糜突試烟微官待五斗上客忝三千乞食顏何弱攤
書腹可便王孫叨一飯圖報在何年

再謝昆翁惠酒

久客囊仍罄新豐價轉高白衣將折簡丹液荷投醪渴吻
從沾潤愁腸破寐寒杯中瀉醞醪塞上失葡萄頓覺羈懷
壯旋於詩興豪甕旁須醉卧且莫問明朝

桃源澗聽泉

何處銀河瀉桃源霽後看無雷自隱々不雨已澗々夾澗
山如界尋源谷似盤穿雲芒屨濕飛瀑薜衣寒漱玉鳴清

瀨流珠噴急湍會心偏此地斜日獨凭欄

春莫訪陳雨亭于南園

偶懷嵇呂駕言發刺溪船入戶惟花徑開軒有秫田室生
莊叟白亭草子雲玄金馬非真隱青蓮自謫仙一區三畝
宅萬里五湖烟園擬辟疆勝賓漸來仲賢論文嘉樹下對
酒落花前共挹西山爽仍忻靜地偏歡携永今日無奈夕
陽天

刻孫百川先生詩集

明海虞百川孫 樓子虛父 著

同邑 邵昌鋤耕夫父

梁溪子婿華滋蕃伯昌父校閱

七言律詩

登拂水巖和王暘谷韻

最高峰上振衣臨躡盡丹梯快賞心
四望烟霞飛畫棟半空鐘磬出叢林
每憐風雨霏雀節却喜湖山霽積陰
欲紀勝遊遺故事且披蒼蘚勒雲岑

送邑博陳竹堂擢掌平湖教

片帆東挂下旗亭春樹交啼柳外鶯
此日客星虛太史十

年宦績在明經蘇湖夫子同今古吳越諸生異祖迎惆悵
何從問竒字風舸輕送海潮平

入高橋門

帝城雲樹鬱峩峩百二河山四望遙龍虎糾蟠鍾王氣鳳
麟雜沓獻熙朝縻蕪兩岬隨金勒楊柳千條拂畫橋佩
得吳鉤光射斗不將詞賦待公軺

天壽節禮部奉祝

儀官鳴珮押班齊鹵簿階前肅拜稽火對千圍聯寶炬水
沉萬斛散金猊華封歡動南山祝翠幄遙瞻北極低彩筆
何年歌聖德湯從擊壤頌鳧鷖

金陵旅館對月

苧袍涼沁露華侵十二街中月色沉桂影婆娑千里共燈
花零落五更深敲窓梧葉驚鄉夢繞砌蛩聲助越吟延佇
黯然愁不語垂簾聊自理瑤琴

試院文燈

刁斗聲中促漏頻上元城裡上元春竿頭列炬光搖斗堤
上聯珠影入津璀璨欲寒孤月魄繽紛遙動十街塵漫誇
身在卿雲上會見星文接紫宸

次大司寇春岡劉公退食書懷

西郭遙分上苑春博山香散靜如神鶴歸堂下槐陰午燕
舞簾前草色新開閣客來勤倒屣趨庭人遠憶書紳世臣
為國司邦禁莫訝刑書委重頻

並頭白蓮次韻

花神幻出縞衣裳對舞凌波水月涼
湘浦吳皇凝粉淚陽姊妹洗紅妝
鴛鴦交翼披青蓋蜂蝶分鬢隔素房
縱是若耶多色相煖風吹到一般香

新秋錢侍御薜蘿齋校文作

急雨初收日下春海榴相映綺疏紅
火雲不斷暮山外新月乍沉秋水中
彩筆分題同賦暑盡欄斜凭獨吟風
玄蟬莫噪高梧樹柱史青衣曲正工

庚申先考忌日

四十年前選閔凶先考卒於正德庚辰五月二十七日每逢家忌涕無從終
天未識靈椿古予時五齡此日偏憐小桂叢予今與弟共

入卷內時緇驚絕筆先考每有時鏡中朝對想遺容父老

肖貌極却慚藿食無三釜几上猶將麥飯供每言

小樓秋夜

寶篆沉烟萬籟收一聲旅雁送清秋
芸香四壁書千卷茗熟三更月滿樓
直儼御風飄兩袖試將舞雪拂雙鈎
倚闌顧影誰為侶長嘯遺音切斗牛

輓北虞先生二首次韻

山陽笛裏一聲愁馬帳輕殘高座收
遺恨不隨終古滅羈魂應逐大江流
匣中劍去人俱化囊底詩存名自留
反袂河干重回首郊麟依舊泣春秋

緇衣染盡落陽塵白首卑棲一命新
黃土忽埋籌國策青

百川先生集 卷之十二
三
羶不減在家貧已知文譽為无物還信儒冠解誤人欲擬
招魂賦天問丈夫雄志幾時伸

病餘弗克偕計北上客有強予同往者詩以辭之
病渴相如卧錦城漢皇何日賜金莖亦知附驥能千里却
悔屠龍誤半生三上祇增韓子辱兩生豈為舛孫行長安
倘遇公車召為報甘泉賦已成

兩亭陳太常席上會饋牡丹者適至

三月長安滿目塵一枝忽見洛陽春名花正合君為主高
會應慚我作賓枕上幾回江左夢酒邊都忘客中身只愁
風雨多相妬且趁芳辰醉百巡

錢文峰擢令長沙以詩留別用韻送之無以自慨

長安踏遍馬蹄沙又負春風一度花念我上書猶送旅羨
君捧檄且還家好將案牘求民瘼休論文章是國華回首
玉河分袂處楚雲燕月捻堪嗟

燕都送陳抱冲應試南還二首

魏闢辭親戰鎖闈秋江東下疾於飛棄襦已羨終童少負
弩行看司馬歸括目萬人驚白面點頭一卷爍朱衣建安
捻是陳琳勝遲爾仍來直紫薇

羨爾英年解著文書堂帶草滿香芸身馳故苑幾千里名
冠園橋五百羣把袂躊躇三月別懷人南北一江分目君
忽起吳鄉思悵望陽關空白雲

旅況

百川先生集卷之十二
春明門內亦天涯在御琴書不是家
愁裡頻看虛室月夢中欲采故園花
竭來冀北天猶遠長望江南路正賒
取醉只須燕市酒羈魂偏攬暮歸鴉

賀西疇郭公

猶記移舟謁朝川開樽花下未華顛
琅函紫誥承天寵寶紀丹書列地仙
江上獨尋鷗鳥伴日邊都付鳳毛賢
梁家德耀堪偕隱況是同躋杖國年

李岫婁山房李千兵也棄官習隱於靈隱寺

將軍馬上佩雙鞬拂袖歸來此養高
路俠情篁迴九折樓平遙樹逼層霄
危梁濺瀑寒芒孺絕巘梯雲濕薜袍
却愧塵中緣未斷出山空負洞門桃

懷太史趙定宇

玉堂僊署切西清昭代詞宗屬馬卿
金匱編年池上草栢梁聯句殿中賡
黑衣堂吏供華牘赤幘奚奴薦大烹
一自江東人去後暮雲長望隔瑤京

過蔣比部園居

仙吏冥棲別墅開春風有客問竒來
近峰入座流丹靄曲徑穿花破綠苔
適意琴書皆自得會心魚鳥了無猜
東山已繫蒼生望未許清時滯酒杯

試院即事

兩階挾榮獻群賢鎖院深々別有天
千騎橫戈秋角勝六宮臨鏡曉爭妍
墨光濕雨雲屯硯旗影翻風日過磚
一自

平原曾脫穎祇今猶憶苦心年

又

義馭禺中忽半春
嗒然無語聽松風
門前彩筆誰題鳳
堂下青衿盡吐虹
自媿九臬能識馬
却疑廿載學屠龍
文光此夜干牛斗
絕勝紗籠滿院紅

壽陳兩亭

直聲逸殿逐羣邪
獨立螭頭裂相麻
青瑣早辭然諫草
琳宮老去禮曇花
彩衣堂上如萊子
玉樹堦前似謝家
一自圖南歸隱後
赤城猶帶華山霞

王水簾遊杭兼省其弟僉憲公

吳客齋糧指越天
片帆高入武林烟
春風載酒山中寺
明

月留人水上船
覽勝穿雲追往蹟
紀遊掃壁賦新篇
遙知憲節逢迎日
花萼翻翻玉樹聯

詠紅梅

羅浮枝上着春嬌
況有啼鶯淚雨饒
香襲煖風魂易醉
骨欺寒霰色難消
冰肌不散施朱粉
豔質真堪闔絳桃
莫遣壽陽重點額
六宮應如曉妝妖

庚午門生胡野臺陳海樓遠訪郡齋燈下款之兼送
北上

忻逢二妙語清宵
文酒慚供澗沁毛
自是空羣千里駿
非關一顧九方臯
長驅吳劍橫無敵
北望燕臺築最高
試聽春雷聲乍震
雙龍並躍起江濤

輓王思質翁

次徐存翁韻

帝遣元戎握重兵，夷氛萬里劃然清。
功高武穆遭讒妬，孝感緹縈荷聖明。
江上鷓鴣囊魂獨，耿洛陽藁葬禮初成。
雲中故吏看遺劍，隨淚應同峴首情。

一自雲中詔解兵，議功國論待時清。
君恩大霈滄波濶，臣節孤懸塞月明。
春草隴頭蒼色繞，午槐庭下綠陰成。
九原可作神猶在，應慰遙思頗牧情。

開府當年善將兵，櫓槍不掃紫薇清。
風行北地思頗牧，星殞西川泣孔明。
烈士豈遑為後計，讒夫無奈忌功成。
鳳毛池上翩翩起，應慰平生報國情。

北鑰皇州鎮戍兵，狼烽不警塞烟清。
邊氓此日思逾切，國史他年論自明。
屈子忠魂招不返，武侯雄畧廢垂成。
薊門長望揮戈處，自古功高恣愴情。

思泉胡進士使畢還家日贈

岱嶽驅車飛使星，晴川畫繡復揚舲。
文章孔壁窺東魯，風雨吳江化北溟。
歡晤隔年逢故國，離悰千里憶長亭。
皇華弭節應遄發，況及春堤柳色青。

送抱冲陳文學應試金陵

董帷儒雅冠西京，漢帝徵賢蚤建旌。
南國瑤琨充歲賦，上林鸚鵡待秋橫。
六經家擅青箱學，四冊名傳紫綬榮。
楚璧况逢三獻日，即看聲價重連城。

冬抄卓月波光祿遠訪留飲齋中

蒼曝斜陽忽叩門錢塘詞客蜀王孫堅冰江上淹行色霏
雪樽前破醉魂談藝慚無鸚鵡賦典衣賴有鸛鶴存他年
欲識西湖主還訪君家何處村

四明桂五雲傳經吾邑杪歲言歸詩以送之兼訂後
晤

橫經講藝擁皋比絳帳諸生盡解頤吳越一帆鴻跡杳文
章五色鳳毛竒携書漫作窮冬別問字体忘隔歲期長望
角東人忽遠西陵雲樹渺江涯

乙亥元日書懷

回首勞勞六十春文章勲業摠輸人匡時誤向齊搯瑟失
路慚同漢積薪往事已非空得老此身但在莫憂貧明朝
且探南枝去又是尋花第一巡

贈太僕東白顧先生歸田次韻

卧龍初起後懸車回首東華媿不如漢月廿年驅塞馬秋
風一夜憶吳魚尚方曾請誅奸劔北郭新編種樹書獨有
湛恩渾不忘玉階猶夢佩蒼瑤

己內郭鴛人忌日

悠悠廿載竟何之長夜漫漫繫我思黃土未違同穴願白
頭已負百年期孱孫差慰人間念壯子還增地下悲老淚
不堪頻自灑掩關脉脉寄哀詞

東顧東白太僕

玉堂仙吏老江東輶聽春雷起卧龍宣室新恩徵賈誼北

百川先生集卷之十二
山舊隱返周顛白蓮社結萍螭陞綠野堂開入虎峰逸殿
直聲猶在耳冥鴻高舉羨雲蹤

丙午元宵二首

春風紫陌月輪斜火樹千圍夜作花璀璨光搖銀漢魄氤
氲塵混赤城霞十街迎曙籠雲氣萬戶藏春逗歲華湯有
城西村社鼓夢迴猶聽隔江過
銀箭頻催欲二更十街燈火沸山城風前漫衍魚龍戲雲
外遙傳鸞鳳聲野犬吠喧天不夜樹鴉飛散月逾明遐瞻
星漢文光接笑指溪堂碧靄生

感時事

栢臺彈疏下明堂屠伯今朝亦促裝朴鬼庭前踰月白錢
神門外待昏黃滿船琴鶴歸非趙一夜蓴鱸去豈張行出
南關試回首城中歌舞涕如湯

嚴養翁樂壽園次韻

贊皇別墅切郊南日陟攀躋力正堪匡阜老人峰到五台
階上相位登三歌聲縹緲樓千尺樹影參差水一函昨自
黃扉解組後祇令人世有彭聃

五言絕句

登樓吟望得雨中烟樹萬人家之句字為賦之
其一

幾陣麥寒風三日黃梅兩扁舟簑笠翁獨作滄江主

其二

連豔榴花兩爐香
栢子風西樓簾暮捲
山色有無中
其三

杳靄雲中路微茫
水上天飛鷗一雙
白衝破半江烟
其四

冥冥混霄壤脉脉連
朝暮却憶大夫松
乘輿蔭高樹
其五

恒陰海欲漫積浥石
應爛何當生羽翰
搏風飛九萬
其六

深淖斷來往長途歎
苦辛野橋泥滑猶有
柴筇人
其七

笛韻吟丘蚓鼓吹喧
蝦蟆却憐風雨夜
偏鬧野人家

七言絕句

聞周虛巖談靈谷之勝喜而賦此

古木陰森千里幽
芋袍人隔帝城秋
夜床為語尊前
滕不道身從聽裡遊

五老圖

廬山高並白雲天
猶向人間畫裡傳
對此不知三鳥遠
與君同作六神仙

即事

文墀雀樹午陰圓
韻細風柔咽釋蟬
浙漉簷前花乳落
香心猶抱一蜂眠

藝檀烹茗兩氤氳
供奉茅齋日著文
遮莫門前軒騎過
不

教輕入紫鸞羣

時邑宰來顧却之

擣衣曲四首

井梧霜葉乳紛飛
寒入榆關未授衣
杵影恨隨孤月暗
防秋何日白郎歸

月滿銀床冷翠衾
莎雞繞砌亂秋砧
衣成早向邊州寄
縱到邊州寒已深

皓腕涼侵羅袖單
露華和淚浥難乾
江南秋夜驚寒候
萬里玉關應更寒

砧聲不及泣聲多
井落銀瓶月轉河
欲把金刀試裁却
蕭郎肥瘦近如何

紀荒詩賡北虞先生韻

遠郊近郭搥枯塹
累重翻嫌戶有田
國稅未輸軍稅急
炊烟不見：烽烟

富公昔代守青齊
百萬饑兒活施糜
寄語官家憐赤子
濟人須濟極貧時

垂橐相歡飽夕飡
明朝流去土封門
：前岐路投何處
舉目誰施一飯恩

莫問餅壘盡磬空
漂離骨肉怎相從
喪家一犬狂尋主
饑鼠羣行白月中

裂膚風切怯單衣
菜色尪羸又苦饑
盡室離鄉半途死
羈魂空向月中歸

村鷄死盡晚無啼
面熟形兼問阿誰
挑得野蔬生噉飽
眼

前醫却片時饑
寥落村中只數家相逢揮涕各咨嗟
雨暘愆伏禾都死開
遍名園十月花

治生曾未戒衣初此日空嗟腹有書
身著弊裘蘇季子家
徒四壁漢相如

盡日叢祠絕賽神隨緣持疏向誰陳
廟門立候關黎飯却
是當年檀越人

四望高原盡不毛採薪已遍及桑條
祇餘茅屋堪栖息又
問鳩兒賣鵲巢

楊柳十首

并序 序與前各一首俱毛五雲作予愛其始麗為賡之

昔之賦楊柳者多言征戍之事未盡閨房之緒故有

十年仕宦而識面於投金千里遨遊而題情於織錦
孀嫠抱素帳之悲妬婦洒羅幃之泣愆期之女僂繡
東窓故宮之妓閒居窮巷蘭房蕙質或憔悴於未行
春穀秋紈每棄捐於中道流離怨偶栖璇宮而不言
衰謝娼姬撫金徽而自悼莫不攀婀娜之柔條歎紛
披之翠色淒矣心亂恍然魂驚種々生愁以類而感
即事寓言目詞見意各詠一章以洩幽思若乃玉關
遠別遼西未歸睹之興嗟特其一爾前人述作已多
不復品題

其一

夫婿從官久不歸柳條空自拂羅幃別時顏色渾忘却想

得依稀又恐非
采采柔條遵道周金夫何事忽相投妾心豈似堤前柳蕩
颺春風不自由

其二

郎在天涯冷曲房迴文錦字速相將門前柳線三千尺不
侶離情萬轉長

記得郎行折柳枝、頭今已綠千絲柳絲只解春風舞難
織秋閨萬種思

其三

荒臺舊院柳絲、三月春歸只自垂憔悴妾心終不變殘
枝何事受風吹

孤鸞羞覩雀為屏深院無人盡日扃莫訝章臺不堪折長
條猶是舊時青

其四

窮窳柔楊不自持東風一夜忽離披長條恰好極春色頗
怪黃鸝在別枝

啼老鶯聲花委塵留春不奈復傷春蛾眉底是偏能妬柳
葉無情亦怨顰

其五

爛熳春光少女愁那堪弱柳攪樓頭含情未肯分明語底
是芳菲不耐秋

遊絲為軟燕為嬌楊白花飛意欲撩何事韶光不相待千

百川先生集 卷之十二
金一刻怨春宵

其六

翠華隱、柳眉新選妓徵歌第一人自昔君王西幸蜀飛
花落葉不禁春
春風深鎖別鸞輿馳道迢遙望亦迷妾命自憐輸御柳錦
鶯時向樹頭棲

其七

一入平陽公主家春風只落洞房花生憎薄命如飛絮逐
燕隨鶯自歲華
樂意愁心隔鳳幃小星那敢盼光輝未緣柳色衣侵綠賤
妾由來是綠衣

其八

當日紅顏勝縷衣於今委棄不勝悲關情惟有樓前柳故
向東風鎖翠眉
月掩重門花落紅獨持團扇泣秋風柳眉已淡郎心別休
悵晨妝畫未工

其九

楚王宮裏柳森森新寵何如舊愛深無限慙勤言不得千
絲萬縷掛愁心
為憶離鸞淚雨紅無端漁色閉深宮柳腰不解君前舞只
合山雞對鏡中

其十

百川先生集 卷之十二
吳門燕市翠條長白馬金羈照綺房落盡楊花三月暮空
侯一曲淚千行

曾將歌舞壓秦樓柳線搖金弱更柔惆悵綠肥春欲老王
孫何處解貂裘

題繡女假寐圖

停針倦午暎雲鬟春色撩人不自閒繡得並頭心已亂湯
隨雲雨到巫山

題蔡文姬歸漢圖

萬里從戎妾命浮玉關生入戀胡首蔡孌在用知文字一
拍悲笳一曲羞

題美人調鸚鵡

其八

當日紅顏勝縷衣於今委棄不勝悲關情惟有樓前柳故
向東風鎖翠眉

月掩重門花落紅獨持團扇泣秋風柳眉已淡郎心別休
悵晨妝畫未工

其九

楚王宮裏柳森森新寵何如舊愛深無限慙勤言不得千
絲萬縷掛愁心

為憶離鸞淚雨紅無端漁色閉深宮柳腰不解君前舞只
合山雞對鏡中

其十

百川先生集卷之十二
吳門燕市翠條長白馬金羈照綺房落盡楊花三月暮空
侯一曲淚千行

曾將歌舞壓秦樓柳線搖金弱更柔惆悵綠肥春欲老王
孫何處解貂裘

題繡女假寐圖

停針倦午暉雲鬟春色撩人不自閒繡得並頭心已亂湯
隨雲雨到巫山

題蔡文姬歸漢圖

萬里從戎妾命浮玉關生入戀胡首蔡孌在用知文字一
拍悲笳一曲羞

題美人調鸚鵡

語鳥筠籠通隴西金絛掣鎖熟深閨戲調歌舌消春晝猶
恐春風妬綠衣

公館聞鶯

金衣巧啜綠陰濃長日聲、送煖風記得故園山館裡鳥
歌花影一庭中

訪朱虛谷王百穀墮馬

索句垂鞭信馬蹄故人遙指 帝城西春風醉隋斜陽路
染盡青衫花底泥

詠史

扣馬歸來隱碧岑首陽高節世人欽紫薇亦是周家草空
負當年恥食心

百川先生集 卷之十一
百里旌旗護鬼神鐵錐飛擊犯清塵沙中咫尺猶難覓何
必桃源可避秦

言陸蕙田被盜二首

表安夜半卧僵時暴客探囊了不遺只有青羶尚無恙知
君未贈綠林詩

梁上何人候彥方殘燈挑盡夢微茫犢羸牛被都亡却賸
有平生錦繡腸

贈吳見吳宅諸歌者三首

昨觀諸青新伎可謂一時擅場輒成三詩奉揚娟麗
昔謫仙進清平調詠妃子亦心三疊不能踰其數也
敬錄呈覽兼傳一粲耳

綺筵盡日舞東風花貌鶯聲錦一叢渾似梨園勾小隊十
卿應與十眉同

阿翁娛客每徵歌共醉樓心月影過却羨風流今不遠按
將遺譜奏雲和

移宮換羽轉清謳檻外輕雲遏不流欲贈束綾猶未織新
詩聊當錦纏頭

立夏二十日矣芥中始寄新茶

估客飛舟通一筐綠葦不侶昔年香鳳團雀舌今何在漫
有旗槍尺許長

半薜分携已及瓜豈應百草未開花柔枝盡向山中老對
客仍誇穀兩芽

百川先生集 卷之十一
吳見吳新製遊舫華而不靡其行甚駛余飲其中而
樂之賦三絕句

春遊日：灑西東水色山光罨畫中十里湖波平似掌片
帆飛出水晶宮

破浪凌風翅急湍魚龍水底睡難安青螺十二看將遍一
曲樽前正未闌

茗盞薰爐伴晝長酒徒詞客共滄浪歸橈不用頻搥鼓傳
得聲歌出柳塘

明妃曲三首

長門十載未承恩此日傳宣復斷魂不信和戎更無策至
今遺恨奉春君

金殿徘徊掩淚辭玉關何日是歸期紅顏忍向胡天老謀
國何人贖蔡姬

一閉昭陽深復深無端身墮黑山陰胡笳怨笛那堪聽獨
抱琵琶捺漢音

秦館憶家四首

日落平湖憶倚門烏啼深樹不堪聞春風自到堂前草惟
見峰頭飛白雲

春水盈：春日晴落霞飛處隔山城謝家閒卻西堂月夜
夜江村夢草生

風雨蕭：釀薄寒仙郎何事阻雲巒遙知閨裏三更月不
語燈前綠鬢殘

百川先生集 卷之十二
忽見江梅已落花春來十日乍離家
遙思幼女青燈下猶向歸人問阿爺

癸未孟夏六日即事書懷六首

楚臺人杳意茫茫
環珮無聲冷玉房
一片行雲留不住
空餘殘夢惱襄王

鎖掣金縈放綠衣
徘徊不去繞簾飛
銷魂最苦難為別
袂掩橫波不住啼

月落床虛掩絳綃
一燈相對可憐宵
伶玄老興耽鉛槧
那得樊姬伴寂寥

階前一別即天涯
兩眼相看淚似麻
鸚鵡不知人已去
聲猶自喚琵琶

主恩妾意兩依依
十載懽悰一旦離
我輩此情忘不得
悲來一曲比紅兒

楚猴塚下泣虞兮
劉季悲歌戀戚姬
却怪王郎何太忍
後庭紅粉一齊驅

讀公孫弘傳

平津東閣日延賓
絕似姬公吐握頻
一箇鸞夫容不得
紛紛閣上是何人

詩餘長短句

江南春 次倪雲林韻

玉林初迸黃金筍
晴絲院裏柔風靜
錦鶯睨曉隔花叢
紫燕高低舞簾影
荼蘼尚勒花朝冷
自汲清深試龍井
乳紅

百川先生集卷之十二
飛盡欲沾巾半付東流半委塵鳥聲遲歌聲急清明小雨
攔杆濕易去韶光追不及船頭新漲接天碧錦城自古誇
吳邑十二青螺倚雲立請看點點溪上萍柳花昨日猶營
營

戚氏 次柳耆卿秋夜韻

麗春天一枝紅杏豔幽軒薄倖風顛薄情雨驟更昏烟飄
然頓辭林鳥衣輕蹴墜梁間却教故苑羞殺移根向阻水
遙山蜂媒無便蜂使無憑幾迴枕淚潺湲怪語禽細碎遊
人應亂到處紛喧 一宵永隔如年孤燈明滅和影伴更
闌蟾光照那入何處欲問嬋娟恨綿綿滿眼風物那堪懊
悔當日蕊宮半吐半含葉嫩枝柔欲折未折遷延 謬憶

蒸霞侶雙頤寸臉宜喜宜歡只願成陰結子待春陽歲
共留連無端好事多磨彩雲易散九十春臨限殢名花誰
不心縈絆朝看鏡日減朱顏倩東君休暖休寒趁嫣紅一
點未全殘拚錦首藉落英片長抱花眠

解連環 次周義成閨情韻

柔情暗托奈平地風波對面遼邈本來面目野鴛央但隨
浪逐波福慳緣薄幽閣沉淪險斷送秋千繩索是粧圈弄
套恰有千金返魂靈藥 料得水魚相若待石爛海枯馬
頭生角從教錦片前程和密雲濃雨一筆勾却萬紫千紅
捻不心孤梅芳萼任春風墜水沾泥把伊零落

戊午春余意忽有所失剔燈納悶無以自解檢詩餘

惟戚氏最稱長調可以寫愁而其名又類女郎即揮
毫賡之抑鬱無聊情見乎詞每悲歌擊節涕輒無從
語云情之所鍾正在我輩百年之內所歡幾何能無
眷之不然余亦雅知自束而心豈易蕩若此然發情
心義古之婦人亦能之況予為丈夫者耶復調解連
環以志恨云

念奴嬌 用東坡赤壁懷古韻

江南燕北數千里歷遍波濤風物客久囊虛裘已弊絕似
家徒四壁勦業難成容顏易老鏡裡朝添雪五旬到也笑
來非是英傑 追憶書劍初携闔閭城外搥鼓船頭叢談
笑封侯男子事一點雄心未滅七戰文場四逢奪錦勝負
爭絲髮半生過矣晚成須問靈月

盛年浮氣漫自許獨步江東人物躍馬橫戈圍萬騎突戰
更無堅壁歲月奔馳勦名蹭蹬忽爾頭顱雪而今俯首虛
名慚負人傑 猶詫紙上雲烟胸中塊礪筆底花爭發世
載芸窓千萬卷頓使一朝埋滅白璧誰沽青錢未選憤欲
衝冠髮重門自掩黃昏羞對孤月

功名難準筭前程不似囊中探物却悔當年勤誦讀夜半
偷光隣壁孤憤難降牀頭拔劍漫舞光如雪漢家開國書
生不在三傑 試看桃李爭春薔薇競夏芳菊深秋發過
眼韶華能有幾爭侶遲開遲滅青鬢今朝黃壚明日幾個
登華髮人生有酒金樽頻倒明月

高牙大纛畢竟是自古人間尤物咫尺丹霄行已到猶隔
重關復辟入手難逢轉頭易去一點洪爐雪人生如意一
時休逞豪傑 自媿祖武難繩毋勿未報三嘆中宵幾何
處雞聲來枕上幾見孤燈明滅一事無成半生已過博得
蕭蕭髮雲山悵望歸家知是何月

蜉蝣身世嘆人生何苦勞形役物轉眼興亡千古笑何異
孫曹赤壁遊子天涯倚闌日暮應念頭盈雪太行雲白思
親豈但仁傑 閒聽遠樹啼鳥夜深還不寐有懷明發戀
關懷鄉愁萬種都把熱心灰滅謀計迂疎年華荏苒俛首
搔蓬髮長安孤客笑來幾拜新月

摩娑雙眼漫捫腹空洞此中無物但可容卿三百輩仍佇
圖書東壁詠月磯頭歌風沛上還賦梁園雪揮毫對客座
中若箇雄傑 忽聽雁叫南樓蛩吟北牖一夜清商發兩
袖涼生零露襲銀漢橫斜將滅對酒長歌攬衣獨步颯
風吹髮杜鵑枝上聲啼落殘月

紅塵深處轉愁腸却憶江南景物變豔雲開梅雨霽一片
蒼崕翠壁竹裡鳴淙松間瀉瀑衣袂飛珠雪流觴通詠山
中亦是奇傑 而今歸路迢遙宦途迤逗彈缺悲歌發去
住無憑眠未穩好夢隨生隨滅過雁牽情吟蛩送淚聽裡
堪華髮青山不負有時還醉蘿月

茫茫知己塵埃裡誰識藥籠中物悲憤狂歌揮醉墨湯洒
斜鴉滿壁疏上金域名標銅柱陣壑陰山雪古人往矣今

人豈乏材傑 幾見海徵馳書翔方飛羽箭壯懷激數百
萬甲兵三尺劍要使夷氛銷滅諭蜀相如乘槎博望遠畧
威窮髮長鳴櫓下自憐虛老時月

念奴嬌一名百字令詞剛百字也又名大江東去又
名酹江月又名赤壁詞則以坡老赤壁懷古首尾兩
言得名詞人賦此調者多矣而坡老一章獨冠今古
後人屬而和者不少余戊辰歲留滯燕都旅愁間作
輒寄興一闋共得八首不使棄之湯錄備覽情至當
復賡之不知此後又積若干也

閨序四詞蝶戀花次韻

折柳門前贈卽別纔過清明又見楊花雪燕子樓中腸欲

絕舞衣冷落東風歇

啼鶯亦自聲嗚咽羅幌生寒人伴

牀頭月不記離駒初唱徹殷勤更把歸期說

歡會無多易離別永日炎威炙損冰肌雪網戶蟪蛄入跡

絕石林午夢愁方歇

高樹玄蟬鳴復咽獨倚涼亭紈扇

搖明月恨殺晨鷄三唱徹夢中驚斷和他說

一自旗亭馬首別羞覩菱花青鬢從添雪旅雁歸來書後

絕擣衣無力砧聲歇

四壁蛩聲和淚咽此夕天孫又渡

明河月銀箭頻催歡未徹蕭郎好念星前說

可惜韶年在離別彈缺歸來休卧長安雪遠道悲風梅使

絕非關薄倖恩情歇

銅漏凝冰流復咽十里秦樓知醉

誰家月撥盡寒爐長夜徹琵琶謔訴相思說



